

## HEBREO IMÁCIMO CUEGABE

*(Daa bimaci jáifodo mameina Judúuai)*

*La Carta a los Hebreos*

*Juzíñamui ie Jitodo ja comínimo úrite*

<sup>1</sup> Jaiái ninomo cai judúuai jaiáidigimamo Juzíñamui úrite. Ua, ie uai llórainido diga icaiño, diga jáifodo jóoide uáillaido úrite. <sup>2</sup> Mei íadi ja birui íirairuillaído Juzíñamui ie Jitodo caimo úrite. Bie Jitó uaido Juzíñamui jaiái bie éniéna naa úcuairi finode. Iemo naga raa íeíéna náamatallena Juzíñamui íéna mamede. <sup>3</sup> Afe Jitó ie Moomo ite ebíredena jino cíotatímie. Daje llezica afémie jino náiraímo cíotaga; ua daje Juzíñamui izóidímie. Nana finoca ráaniaina afémie dájena jaináitano ie ñue riírede uáillaido nágarui ñue jaícina finócana uite. Bímie, cruzmo dama ie die tótajado cai fiénidifuiái ñue múiñua mei, caífo monamo ite Juzíñamui nabezi dibénemo ráinazaide, dinómona nahí illáimaillena.

*Juzíñamui Jitó Juzíñamui abí imáciai baimo fígomie*

<sup>4</sup> Afémie afe jamánomo riíredinomo jáillamona, nana Juzíñamui abí imáciai baimo fígomíéna jaide. <sup>5</sup> Juzíñamui ie abí imácimona dáamie jaca “Cue jítódio” daííñede. Ua, “Cue Jitódio, ja birui illáimana o jóoneitícue” jaca daje izóí íaíoiéna daííñede. Mei íadi ie Jitó Jesucrístona daíí daide. Daje izóí ie abí imácimona dáamíéna “O moona

íticue” daiñede. Dáanomo “Cue jitóitio” daiñede. Mei íadi Jesuna dai daide. <sup>6</sup> Ua Juzíñamui ie izoide daade Jitona bie éniemo comuitajano daide:

Mai, nana Juzíñamui abi imaci, bie cue jitona jacíruioicana ñue omoi íóbitari.

<sup>7</sup> Mei íadi abi imácina Juzíñamui daide:

Bimaci cue abi canórainina íllamona, íaioina ocuífiredicue. Iemona jairifo raire náidacaila izói, bimaci cue ocuícana raire jetáfirediaioi.

Afe izói nana cue canófirede cue abi imaci jacírede boode iraiçi izói, íaioina ocuífiredicue, — daide.

<sup>8</sup> Mei jíáifodo ie Jitona daide:

Juzíñamui o íllamona, o illáimana illirui jaca ninomo zíñona íite.

Ñue comécina jaícínainafuedo jaca illáimaifireitio.

<sup>9</sup> Ua, comécina jaícínainafuena izíruitio, mei íadi fiénidifuiamo éoicana eróidío.

Iemona Juzíñamui, ua o Juzíñamui, jae ona íóbitade. Nana Juzíñamui uaina jíeruite o nabáíñiai cáimadua baimo, cáimatagao, — daide.

<sup>10</sup> Jíáinomo ie Jitona Juzíñamui daide:

O Ocuíraimadio.

Naga ráaniai o táinia mei, bie énie finódío.

Nana monamo ite naga úcuai o ónoído finócano.

<sup>11</sup> Afe énie naa úcuairi niné táinocaitiaioi, mei íadi o jaca zíñona íitio.

Aféniai jácara iníroillai zabilla izói zábitiaioi.

<sup>12</sup> Iemo inícuero dócoiano oni jóonia izói, oni eneno íaioina jóoneitio.

Iemona iniroi jíáiroina abimo jita izói, bínie naa ucúduairi méidoficaitiaioi.

Mei íadi o jaca méidoñelloza, dinó nñmieitio.

Omo itifue jaca ziiñona íite.

<sup>13</sup> ¿Ñie mei ie abi ímieimo Juziñamui llogámie:

O fairíconi o anamo cue anáfenotalle llezica mai  
benó cue nabézimo illaíma nabai izói  
ráinazaibi?

Daíí daínámiena íñede. Dama ie Jitó Jesuna daíí  
daíde. <sup>14</sup> Nana afe Juziñamui abi imaci Juziñamui  
ocuica canófirede jóriaíai. Ua Juziñamui orécaíaioi,  
afémiedo jíllotino ñue rairuíllena.

## 2

*Cristo caimo lluaíbiga jíllona uaimo ñue  
úíñoredicai*

<sup>1</sup> Ie jira Juziñamui Jitó, Jesucristo daíí  
naga illaíma baímo jáidímiena íllamona, nana  
Juziñamuimona cai cacana uaillai jeire cai olle  
iere jitáirede; omoi jefóniaí ñue jinéoiri. Aféuaimo  
ñue omoi cacáreiri, oni nibéfodo fiénidífueimo cai  
baííñeíllena.

<sup>2</sup> Mei Juziñamui jaiái ie abi imácido llogáuai  
jaca oni caitánide. Naga aféuaina jeire oñédino  
naa cacáfinidinori raíre iere duere finócaíaioi.  
Mei afe fiénidífue finuamona Juziñamui íaíoiimo  
jaícina íbana ote. <sup>3</sup> Mei íadi birui aféuai baímo  
jamánomo ñue ríírede uaina cacádinodicai. Ie  
jira bie Crístromona cai cacana uáíllaina jeire cai  
óñenia, ¿ñíífuedo jaícina íba uáfuemona jílloticaí?  
jíllonidicai! Afe baímo ñue ríírede uai nano  
fueñe Ocuíraíma Jesucristo caimo llogáuai. Ie  
mei ie daínana cacádinodo aféuai jae cai uafue  
daííllena llotátaga. <sup>4</sup> Afe íaíoi daína uaimo onótate  
raado Juziñamui ñue uai nabáitate. Iemo jíái

jacírede raado, aillo ciórainina raa diga afémie ñue uai nabáitate, íaioi daínáuaimo ñue cai ñnollena. Afe llezica Juzíñamui ie jitáinafue izói, ie Ñuera Joreño ñúefuiai finolle ríino, illa dígamierie íaioimo fecade, daje izói caimo.

*Jesucristo Juzíñamui Jitó íadi afémie cai illa izói, fia cómena íficaide*

<sup>5</sup> Cai úrifirena ñuera úireitiruillaído nímie illáimaillena, Juzíñamui ie abi imácina: “Illáinina jáitiomo?” daíñede. <sup>6</sup> Mei jíáifodo comínina illáimaitaacade. Jaiai Juzíñamui Cuegáuaimo David Juzíñamuina daide:

¡Ñii naga come Juzíñamui dibénedo jamáimíaina!

¿Ñibái mei íaioimo comécidío?

¿Ñibái mei íaioi jitótiamo járitaitío?

<sup>7</sup> Mei uáfueña due jiza o abi imaci jofófenemo comínina comúitatio.

Illaíma ebírenano naa ñúefue diga íaioimo nitádío.

<sup>8</sup> Naga raa íaioi anamo o itátatio.

Daí naga raa íima anamo itábicaillamona, jae minica ie anamo itábicaíñedena íñede. Mei íadi ja birui íima dibénedo naga raana náamatañega. Afe izóiñedeza; afémie nahí náamañede. <sup>9</sup> Mei íadi jíáifodo birui Jesuna cai onónamona íemo comécidícai. Afémie nana íanori due jiza Juzíñamui abi imaci jofófemo jónegamie. Aféruído afe Jesús nano cai jíáinona, tilla onóillena facade; mei afe llezica nana comini fiénidífue ícoinia Juzíñamui zóofegamieza. Ie mei tíide meine abido cáanamona jamánomoidimíena jaide. Afe mei afémie, illaíma izói, ñúefueña nitácámie, jae ebire finócamie, mei nauí ie tíllaruimo íere duere ie zefuíllamona.

Juzíñamui cairi dúecaillano, nana comini niné táinocaitañellena cai ícoinia Jesuna daí zefuítate.

<sup>10</sup> Juzíñamui daí ie Jitó duere finoille caimare íemo jóbide. Ie jira Juzíñamui íaioina jíllotaite ífódímie duere zefuíllafuedo nana cai jíllonafuena ñue fuitade. Mei jíi, naga raa Juzíñamui íeiena ie ínuamona ja birui itíaioi. Afémie nana comínimona aillo jitótiai jíllocade ie caimare ebírenanomo dáanomo íaioi dúcizaillena. <sup>11</sup> Mei Juzíñamui dibénemo oni jónetímie Jesús, nana Juzíñamui dibénemo oni jónegamací dígá daje Juzíñamuina móorediaioi. Iemona, cai baimo jamánomoidímie íadi, Jesús “Cue ámatiaidíomoi” daí dánana meáiruiñede. <sup>12</sup> Afémie Juzíñamuina daide:

O mámece cue ámatiaimo jino llóiticue.

Nana omo gairídino cígiri rocana ñúefue omo nítaiticue.

<sup>13</sup> Jiáinomo Cuegáuaimo daide:

Cue Juzíñamuidio. Omo ínoiticue.

Ie mei jiáinomo daide:

Be, benó iticue, Juzíñamui cuemo iga naa úruiaíri.

<sup>14</sup> Onódiomoiiza, nana cai jae cómena comuítagacai. Daí cai íllamona, daje izói Jesús dama cómena comuíbicaide. (Ua, fia come izói jéciga.) Afe mei come abí íemo íllamona, ie tíllado cai títaite Taífena ríinitade. <sup>15</sup> Jaiáimona nana tílle jágiedo Taífemo rairuícamacídicaí. Mei íadi Jesús jae cai jacíruiñeillena nane ñue cai finode. Ja ráiruiñeganona afémie daí cai ñue orede, nana nauí cai caana llezica tíllena jacíruiticaí íadi. <sup>16</sup> Mei uáfodo onógaza: Jesús

ie bíllado Juzíñamui abí imácina cánuaibíñedeza, mei íadi cómena íficaillano nana Abrahámona comuídigimana cánuaibite naa jíáie Juzíñamuimo ínotinori. <sup>17</sup> Afémie cai cánuaibillemona ie ámatiai nana íaioi illa izói afémie íficaillana iere jítaíredeza, mei dúecaífirede nahí comínimona Juzíñamuimo comínido úritillaimana jáideza. Ua ínofirega Juzíñamuimo úriraimana jáiacade, afe daí ie tíllado comínimo íte fiénidífuiai oni muiñóllena. <sup>18</sup> Mei Jesucristo íaífue fiení facátafuiaimona duere zefuide, aféfuemo baííñede íadi; íemona ja birui fiení Taife facátagamacina cánua ríino Crístomo íteza, ja caina ñue canórede.

### 3

#### *Jesús Moisés baimo jamánomoidimie*

<sup>1</sup> Ie jira, cue ñue ámatiai, Juzíñamui uáidogamací díbénemo jáináidíomoiiza, Jesumo izire comeci omoi facari; ua cai jeire oga ñúefue lluaíbitagamíemo ñue comeci omoi facari. Iemo nane Juzíñamui díbénemo caído ñue úritimíemo, mai íemo comeci omoi facari. <sup>2</sup> Bie Jesús íena daí mamédímie ocuica uaina jaca nágaruillai ínofirede; ua, jáiáidímie Moisés nana íemo llogáuaina jeire ófirena izói, afe izói bímie nana íemo ocuica uaina jeire ófirede. <sup>3-4</sup> Jae onódiomoiiza naga jofo come niga; dama abina niñédeza. Mei íadi naga ráaniai finódimie Juzíñamui. Iemo daje izói ja onódiomoiiza, naga jofo niraima afe nigaco baimo ñúemieza. Afémíemo jamánomo ñúefue jóonerede. Ie izói afe bie Jesús Moisés baimo ñúefuena nitáregamie, mei naga raa afémie

comuítagaza; íemo jiái daje izói Juziñamuimo cai jaináinana Jesús comuítateza. <sup>5</sup> Ua, afe Moisés nana Juziñamui íemo llogáuai, Juziñamui dibénemo táijiacadimie izói, aféuaina ñue jaícina Juziñamui eneno nizeca Israel náiraímo llotátate. Afe daií afémie ie méifodo bite llófuellifuemo uai nabáitate. <sup>6</sup> Mei íadi Cristo, jofona náamataga Jitó izói, nana ie anamo itínona ñue jaícina ocuíoide. (Afe daií Cristo Moisés báifene ímienaza onódicai, mei naga jitó, jofo ero táijiraíma baímo itímienaza.) Iemona Cristo dáinana, cai ínuafue ñue riire itífuedo are illa ícoímo jeire cai oíadi, Juziñamui comínidicai. Afe llezica afémiemo caímare cai úiñuana jitáirede.

*Juziñamui comini comeci caímare uái illafue*

<sup>7</sup> Ie jira Juziñamui Ñuera Joreño jaiái Cuegáuaido daíde:

Birui Juziñamui daínáuai omoi cacana llezica omoi coméciaí riiretañeno iri.

<sup>8</sup> Jaiái énie zaféredinodo Israel comini facátaruimo afémaci íaíoi comeci riire ínuano Juziñamuina uáitatiaíoi.

Jíi, afe izói omoi iñeno iri, daíde.

<sup>9</sup> Iemo nane Juziñamui daíde:

Aféruillaído jaiái omoi uzútiaí Judíuai cuemo íinoñeno fieni facátafuedo cuena facátatiaíoi. Cuarenta díga fimónado nana íaíoiímo cue finócafuaína ciódiaíoi íadi, cuemo fieni comécidiaíoi.

<sup>10</sup> Ie jira afe bigíma cuena rícaítade.

Afémacido daídique: “Íaíoi comeci cuemo figo jaináíñenamona, cue lloga io onóñeno oni nibéfodo jáidinona itíaíoi.”

11 Iemona áferi icírillano riírede uaido daídícue:  
 “Jaca cue lloga caimare comécina uái  
 ocózinailana óñeitíaiói,” daídícue.

12 Amatíai, daje izói figóñede, ñúfueña íáiruiga  
 íñoñede comécimona mai abí omoi rairuiri,  
 afe izói omoi íñeillena. Mei afe izóidímie cai  
 caade Juzíñamuimona oni eneno jica íteza. 13 Mei  
 íadí nágaruillaído, Juzíñamui ómoína nai uáidua  
 llezica, Juzíñamui dibénemo ñue riire jainairi.  
 Iemo dani ómoimona ñue lletari. Daíí ñue  
 omoi llóiri, fiénidífue ie abi jífuiafuedo buna  
 ómoimona dáamie comécina riíreiñellena. 14 Mei  
 nanóidemona caimo ite izire ínogafue, riire  
 fáicanocaiñeno uáfueña cai onóyadi, jae Cristo  
 dibénemo jaináidinodícai. Aféfuemo rairuíñeno ñue  
 omoi jíeruiri.

15 Juzíñamui Cuegáuai daíí daíde:

Birui Juzíñamui daínáuaina omoi cacana llezica,  
 jaiái Israel Juzíñamuina uáitajarumo comeci  
 riírena izói, omoi comeci riíretaneño iri.

16 ¿Bu mei afe Juzíñamui uai cacáđino íadí, nane  
 dáanomó íena uáitate? Mei nana Egíptomona Moisés  
 bairócamaci Juzíñamuina uáitate. 17 ¿Mei nímaci  
 cuarenta díga fimona Juzíñamuina icírítate? Mei  
 nana afe Juzíñamui uai íñoñeno fiéni finódino;  
 ñí afémaci ícuruai énie zaféredínomó fiénocaiga.

18 ¿Ñí náiraína riírede uaido Juzíñamui daíde: “Jaca  
 cue lloga caimare comécina uái ocózinailínomó  
 dúcíñeitíomói?” Mei nana afe ie uaina cacáđinona  
 íadí aféuaina jeire oñéđinona daíí daíde. 19 Daíí  
 íaioína dáínana íaioi íñoñenado jofó cáimanomó  
 dúcínidíaiói. Ua daíí ñúenomó íaioi dúcíñenana  
 onóđícai.



## 4

1 Ja birui Juziñamui uafue caimo lloga caimare comécina uái ocózinailana cai olle uai caimo ite. Aféuai nai caimo illa llezica mai ómoimona dáamie aféuai comécimo óñeillena daiítadifuemona mai abí omoi rairuiri. <sup>2</sup> Mei uafue cai bie ñúefuena llogámacidicai. Ua afe jaiái Egiptomona bairócano ñúefuena llóina izói ñúefuena llogámacidicai. Mei íadi íaioi cacana uai figo íaioina canóñede; mei íñoñediaioiza fia táinona cacádiaioiza. <sup>3-4</sup> Mei íadi Juziñamui lloga caimare comécina uái ocózinailinomo nahí jofó jáidinodicai, mei ie uaina ñue cai ínofirenado. Birui Jesumo cai ínuamona, caimare comeci jacíruiñenafue dibénemo jónegacai. Jira ocózinairanomo táijíñeno cai illa izói, jae caimare uái iticai. Ie mei uire Juziñamui illánomo ñue afémie diga caimare uái íiticai. Jaiái íñoñedinona Juziñamui daide:

Iaioimo cue rícaillano ñue rírede uaido daidicue,  
 “Afe cue lloga caimare comécina uái  
 ocózinailinomo jaca dúciñeitiaioi,” daidicue.  
 Daí Juziñamui íaioina daide. Mei íadi ua íaioi  
 caimare illifue Juziñamui are uícomo mamécaza;  
 mei jae are énie ie comútaruimona, nana  
 Juziñamui ie finócafuiai, naa caimare cai illífuiairi,  
 jae fuitádeza. Mei Juziñamui jáínomo ie  
 Cuegáuaimo afe ie ocózinailaruido úrite; daide:

Juziñamui seis dígarui táijide; ie táijina mei siete  
 iruimo nana ie finócafuiaimona caimare uái  
 ocózinaide.

<sup>5</sup> Afe mei jáíruido ie Cuegáuaimo Juziñamui daide:  
 Cue lloga caimare comécina uái ocózinailinomo  
 dúciñeitiaioi.

<sup>6</sup> Iemo ñúefuena nanoide cacáдино ñnoñenamona afénomo jofó íaioi jáinina méifomo, áfeo nai jáíamaci jáillena túide. <sup>7</sup> Ie jira Juzíñamui diga fimona jailla mei, David roránicuaído comini uáiduano meine jáíe billirui íaioimo llote. Afécuaimo, due jiza íllamona cue lloga izói, Juzíñamui daide:

Birui Juzíñamui daináuaina cacádiomoiiza omoi comécina riíretaño iri, daide.

<sup>8</sup> Mei íadi Josué afe jáiáidinona nahí caimare come comeci jacíruiñenanomo uiñede. Ie jira diga fimona illa mei Juzíñamui meine abido comini caimare illíruina úrite. <sup>9</sup> Iemona afe nahí caimare come comécina uái ocózinaillafue nai ite, Juzíñamuimo jáináidimacina dani íaioiena maiñóllena. Afe ñue caimare cai illífue ocózinaillarui mo cai ocózinailla izoide. <sup>10</sup> Mei naga afe Juzíñamuimona oga caimare illífue mañódime, dama ie jíllolle naa ie nícidogano fácanocaillano, caimare uái ite. Ua Juzíñamui naga ráaniai ie finua fuilla mei, ocózinaillano caimare uái ite. Afémie uái illa izói caimare uái iticai. <sup>11</sup> Ie jira afe caimare cai illífue mañí ñue omoi mañori. Mai benómona daí omoi ífireiri, ómoimona buna jáíairagima bífuena íaioi ñnoñenado íaifuemo baiílla izói omoi báíñeillena.

<sup>12</sup> Nana Juzíñamui lloga uai, jaca íocire cáadime izoide. Afe uai jaca ninomo riíredeza, buna oni caitánide uai. Aféuai comini ífóciaimo déífirede; ua íaioi comécina zuitáfirede. Mei jíi, jáire jicaica lloéfado abi ñeta iere jofó ícurumo raire dúcizailla izói, afe izói Juzíñamui uai nana cai comeci ífuai onótate. Uáfuena cai comeci facáduana naa cai comeci jítailafuiai rífidiano ñue uáfodo jáicina jino caimo onótate. <sup>13</sup> Nana Juzíñamui finócafuiái íemona

oni retáidonide. Ua, daa Juzíñamui cióñenamiena iñede. Nana cai comécillafuiai cai finócafuiiai diga, uáfori cai nahí Jicánoraíma ui anamo ite.

*Jesús Juzíñamui dibénemo caído ñue úrifiredillaíma*

<sup>14</sup> Jae Juzíñamui Jitó, Jesús, mona úillie illano iere caifófenemo jaillano, Juzíñamui illánomo dúcide. Dúcillano Juzíñamuimo dibénemo caído ñue raire úriráimana jaide; ua afémie caído úrifiredillaímana jónega. Afe bie úriráíma caímo íllaza, mai nana afémiemo cai comécilli; afémiedo cai ñnogafuiai fáicanocaiñeno jaícina riire ñue íemo cai ñnoilli. <sup>15</sup> Afe caído Juzíñamuimo úrifiredillaíma nana cai abiríidolle ríino iñénana onode. Ua afe cai ríino iñenamona cai féiraifirenana afémie onode. Ie onónamona caímo dúecaifirede; mei afémie cai izoide cómena íficaillamona, nana fiéni facátafuiaína cai cacana izói cacade íadi afe fiénidifuiáimo baiñede. Iemona Juzíñamui dínena jáiredicai. <sup>16</sup> Ie jira Juzíñamui illáímana illánomo cai úrizaiilli; mai omoi jacíruiñeno afe caído úrifiredillaímado Juzíñamuimo raire úrifireiri. Daí íemo úriredicai caina ie dúecaillano cai fiéni finócafuiiai iba caímo óñeillena; daje izói afémie cai jitáilliruido cai canóllena, afémiemo úriredicai.

## 5

<sup>1</sup> Naga come dibéfodo Juzíñamuimo úritillaíma comínimona nizada oga. Uano Juzíñamuimo comínido úrillena mamécamié. Daje izói afémie comini dibéfodo Juzíñamui ióbitalle ráfuiai finófireillena mamécamié. Iaiói Juzíñamuimo fia iga ráaniai afémie izájite. Daje izói íaiói fiénidifue

iba otátañelle fia fállena fecaca tóica ríllenai afémie Juzíñamuimo izájite. <sup>2</sup> Afémie ríinide cómena íllamona, íaiói illa izói abina onóñedimacina fíaicana comeci járitañenado caimare fíraizitaite. Daje izói oni nibéfomo baiídina comeci járitaño llétaite. <sup>3</sup> Mei afe nizécamie cai izói ríinidimie. Iemona dama ie íaifuiái muiñolle tóica rille jíaimaci fécajilla izói, afémie jíai fécajirede. Ua nana comini dibéfodo izáibilla izói, dama íeiena afémie izáibirede.

<sup>4</sup> Afe iere ñuera Juzíñamuimo úriraimana íllena, buna dama ie comeci jitaina izói ínide; dama Juzíñamui jóonegamie daí írena. Afémie caimare jacíruigamie. Jaiáidiruimo daí Juzíñamui Aarona uáidote. Uáiduno, Juzíñamui íena nizeda úritillaimana jóonete. <sup>5</sup> Afe izói Jesucristo

Juzíñamuimo cominido úriraimana íllena raire dama uícoficaiñede. Mei íadi Juzíñamui daí úritillaimana ie jóoniacana llezica íena daide: Cue jítodio; ja birui illáimana o jóoneiticue, daide.

<sup>6</sup> Ie mei daí dainámiena Juzíñamui jíainomo nane daide:

Jaca ninomo Juzíñamuimo comini dibéfodo úriraimadio. Ua jaiái ninomo Juzíñamuimo úriraima Melquisedec izói jaca ninomo Juzíñamuimo comini dibéfodo ziiñona úriraimana ítío.

Aquíe izói Juzíñamui ie Jitó Jesuna daide. <sup>7</sup> Cristo cai come izói bie éniédo jácaillarullaído, izire écana Juzíñamuimo comeci facade. Iemo dáaruído Juzíñamuimo izire jicade. Afémie daí íena jíllotaredimie mo comécido úrite; daide: “Bie cue tíiacanafuemoná maí cue jíllota” daide. Iemo

Moo Juziñamui anamo afémie ñue itábicaillamona comécido Juziñamuimo ie jícajana Juziñamui cacade. <sup>8</sup> Daií Jesucristo Juziñamui Jitó íadi, ie duere zefuillafuiaido ocuilla uai anamo itábicaillana fibide. <sup>9</sup> Afemona afémie daií nana cai jílloillifue ñue fuitállena jamánomo jaícina fibítagamiena jaide. Ie jira nana íemo ñnotimaci dibénemo Jesús zíiñona Jíllotaraimana jaide. Ua zíiñona jíllonafue tainédimiena jaide. <sup>10</sup> Mei jira Melquisedec izóidimie Juziñamuimo comini dibéfodo ziiño úrifireitimiena, Jesús jae Juziñamui mamécamié.

*Cai ñnogafue meine abido cai jáanolle iere jacírede*

<sup>11</sup> Bífuiado aillo úriacadicue, mei íadi iere cacáacañediomoi. Iemona nai figo baitáñedino izói itíomoi. Daií omoi íllamona, bífuiái ómoimo jino cue llole iere féirede. <sup>12</sup> Naui nano Crístomo omoi ñnuaruimona jae diga fimona jaide. Iemona jae oni jíáimacimo omoi llófuerizaille iere jitáirede. Mei jíáifodo ja birui meine abido Juziñamui llogáuai tainéinafuiaina ómoimo jíáima llófuelle jitáirede. Nai monoi jirode úrue izói meine abido úruetaidiomoi; nai figo baitáñedino izói itíomoi. Ua llíciaina nai rínide izóidinona abido jáidiomoi. <sup>13</sup> Mei jíi, naga monoi jirófredino, móonaiñena llezica nai dúetiru. Daje izói naga Juziñamui anamo ñue jaícina caina móonaitade llófueinafue dibénemo baitáñedimie nai úrue izoide. Mei afémaci nai móonaiñeno úruiaí izói baitáñediaioiza. <sup>14</sup> Mei jíáifodo dama móonaite éicomini llíciaina rírena. Afe izói juárede llófueinafue ñue onona dama comécina ñue jéedimacimo dúide; mei afémaci

aillo facáfirenamona ñúefue fiénidifue baimo ñue onónana fibídiaioiza.

## 6

<sup>1</sup> Ie jira afe nánoide Cristo dibéfodo llogáfuiái ómoimo llúana ja moziñocaidicue, jiáie cómo fue ómoimo jino cue llóllena. Omoimo cue lolle bie cómo fue, Juzíñamui llogáuailaido ómoína ñue jaícina móonaitaite. Aféfuiái mai jeire cai olli. Nano uícodo lloga ñúefue jillácina meine abido diga icaiño ómoína llófueñeiticue. Afe nanóidifuiái bie izói daide: “Ómoína jillotañeite omoi nícidogafuiái fáicanocaillano ñúefuena méidori. Méiduanó, mai Juzíñamuimo omoi ínori,” daide. <sup>2</sup> Iemo afe nanóidifuiái báutizaafuedo úrite. Iemo dáanomo onoi cómemo bitafuedo úrite. Daje izói come tülle mei, afe tíidinomona meine abido cáailifue llote. Afe emódomo, írairuimo Juzíñamui nana comínimo jicánolle mei ziiñona duere finótallifuedo úrite. <sup>3</sup> Nana bie nanoide llogáfuiáiina meine abido llófueñeiticue. Mei íadi, Juzíñamui comeci jitaina izói, afémie cue canólledo, ñue móonaitadifuiáiina omoi llófueiticue.

<sup>4-6</sup> Daí birui ómoimo llófueacadicueza, mei nanóidifuiáiina uáitajano oni jiáfodo féiraitimíai íaiói illafue nano ñue ínogafuena jaca méidonide; mei afe ñúefuena nai náfueñediaioiza. ¡Mai, abi omoi rairuiri! Afe daítadimaci nauí dáaruina Juzíñamui llófuegamaci izóidiaioi; ua Juzíñamui dibénedo ifócina déitaganona itíaiói. Daje izói, monamo ite Juzíñamui dáina caimátallifueña facádiaioi. Iemo daje izói afémaci Juzíñamui Ñuera Joreño úicaillana jae facádiaioi. Afe llezica

Juzíñamui ebírede daináuai cómena ñúetatifuena afe íai*oi* fácamona, ñúerana onódia*oi*. Afe emódomo, Juzíñamui Jitó uire illáimana illirui llezica, íemo ite comini cáimadolle ríinodo jae bimaci canócaia*oi*. Jae nana bie núefuiaina fibídia*oi*. Mei íadi afe mei Juzíñamui ífuiaina móonaita*oi*ñeno, aféfuiaiana ía*oi* uáitaiadi ñúefuena méidofinid*inona* jáidia*oi*; mei daí afémaci íllamona Juzíñamui Jitona cruzmo fatátatimaci illa izói afémaci daní itíai*oiza*. Ua nairai uiecori íena jifánodoia izói íena meáidaitadia*oi*. <sup>7</sup> Bie izoide comini comue jacafai aiñena izoide. Juzíñamui bíitaga noci naga éniemo diga ícaíño bíide. Iemona afe éniemona ñue ria aite, afe éniemo táijidino güíllena. Aféniena Juzíñamui ézicite. <sup>8</sup> Iadi jíainomo noci bíilla mei, daa figóñede éegiaí ailla, naa zaie diga. Afe izóidinie ráifíñedeza; n**ib**ai íanori íllamona Juzíñamui fáidoite. Iirainomo afénie jobáillamo dúide, naa afénomo zicódinuairi mei figóñedeza.

*Cai úiñoigafue caina riire nabaide cai ínogafue féiñellena*

<sup>9</sup> Mei íadi cue izíruiga ámatiaidiomoi. Jae cue lloga faidórafue baimo jamánomo ñúefuiaí dibénemo jaináidiomoi. Ua omoi jíllonafuemono comuide cáimaduafuiaí maiñófirediomoi**za**. Aféfuena ñue onódicue. <sup>10</sup> Juzíñamui comécina jaícina jóidimie. Iemona nana íena omoi izíruillamona omoi finoca Juzíñamui comini cánua ráaniaina, afémie féitañede. Daje izói aféfuiaimo nai birui jíeruitiomoi. Ua Juzíñamui jaináidinona izíruillano, ñue afémacina riire canófirediomoi. <sup>11</sup> Ie mei birui afe izire omoi nícidua izói, daje izói ómomon**a** illa dígamieriena

Juzíñamuimo ocuíriri daidicue. Iemona omoí ñnogafuiai jeire ómoína otátaacadicue, omoí úiñoigafue táinomo fáifiñeillena, mei jáífodo ñue jaícina omoí fuitállena. Afemo ómoína nágarui izire coméciiri daidicue. <sup>12</sup> Daí izire omoí comécioillamona ráiraidino illa izóí íñeitiomoíza. Mei omoí ñue comécioillamona, jáífodo daade Juzíñamui lloga ua caimare illafue dibénemo itino illa izóí ítiomoíza. Afémaci íaioí ñnogafuedo íaioí abina ñue finóinafuena Juzíñamuimona otíaioí. Ua comeci járitaiño are illa ícoímo Juzíñamui uícodo íaioímo lloga ñuefuena maiñoíroidiaioí. Íaioí illáfuemo ñue omoí coméciiri, íaioí illa izóí omoí íllena.

<sup>13</sup> Mei jü, Juzíñamui iere ñnofiregamie. Jaiái Abraham illáruimo Juzíñamui uafue uai Abrahamo llote. “Aillo comini jebuítaitio” jaiái uícodo íemo llote. Llua llezica uafue daíllena Juzíñamui dama ie mámecina llínote, aféfuena Abraham ñue ñnollena. Ua Juzíñamui dama ie mámecina llínote, mei jáíe baimo jamánomoidimiena íñédeza. <sup>14</sup> Daí Juzíñamui Abrahana daide: “Uafue iere ona ñue caimátaitaiticue. Jae cue o jitóretallemona, o erófene igímana jamánomo iere jebuítaiticue,” daide. <sup>15</sup> Iemona Abraham comeci raire járitaiño, diga fimona áfemo úiñooidie. Daí ie ocuírina mei, afe Juzíñamui lloga caimare ie nairai jebuíllifuena Abraham ñue maiñoédeza. <sup>16</sup> Bínie comini cígimona dáamie uáfuena daíacana llezica, afémie baimo ríredimie mámecido uafue daíitate. Daí lloga uaina buna oni caitáíñede. Nana dani íaioí júfidogana záitate. <sup>17</sup> Daje izóí



Juzíñamui ie lloga finóllifue, jiáie ñue riírede uaido, aféfuena iere uafue daide. Afémie daií dáideza, mei ie uícodo lloga ñúefuena máíñoitino, afefue ua jiáifodo méidonidena jino íaioimo uáfodo llóiacadeza. <sup>18</sup> Daií Juzíñamui mena caitánide uáillaido íaioimo llote. Afe ménacaiño ie daina dibénemo Juzíñamui táinona llónide. Afémie daií daide, áfemona cai comécina ñue íociretallena. Iemona caimo ie lloga ñue cai jíllonafuemo fáicanocaiñoeno íñofiredicai. Mei jii, cai Jíllotaraima Jesucrístomo jarire jaillano caina ie úiñotaga comeci íaifue dóllena raire íemo jicádicai, caimo ite fiénidifue iba óñeillena. <sup>19</sup> Afémie cai jíllotallena caimare úiñooidicai. Iemona afémie caina daináuai cai comeci nífuenina ñue mozóitade. Ua cai úiñoigafue caina riire nabaide cai íñogafuiai féiñellena. Daií comeci docáiñoeno ñue riire nabáitaga jacíruiñedinodicai. Mei cai jíllotaite cai úiñoгамie Jesús, caifo monamo Juzíñamui nahí ie iránomo íteza. <sup>20</sup> Afe Jesús, cai jáillio ífódimiena afénomo jae jaide. Daií íllamona afémie jae comínido Juzíñamuimo zíñona úritillaimana jaide. Ua, jaiiai Juzíñamuimo úriraima Melquisedec izóinado, Jesús jaca ninomo caido úrite.

## 7

*Jesús, jaiiai Melquisedec illa izói comínido Juzíñamuimo úriraima*

<sup>1</sup> Afe Melquisedec Salem jofue illaíma. Afe llezica afémie comini dibéfodo jamánomoide daade Juzíñamuimo úrifiredimie. Jaiiai illáruimo Abraham jiáie aféniemo ite illáinina anáfenuaide.

Iaioina anáfenuano Abraham meine bítemo, afe Melquisedec io anamo Abrahamo dúcizaide. Dúciillano Melquisedec, Abraham abi ñue finóllena Juzíñamuimo jicade. <sup>2</sup> Afe llezica Abraham nana ie bairoca ñuera ráaniaimona, Juzíñamui íena eneno mameca ráaniaina, Melquisedécimo raiñoñoeno fia fecade. Melquisedec nanoide daína mámecei “Comécina jaícinaidillaima” fueñe daiíacade. Ie mei afémie nane jáíci ote: “Salem Illaima.” Afeci “Comini comécina caimare uái itátatillaima,” daiíacade. <sup>3</sup> Afe Melquisedec moo mámecei jaca onónide, naa ie ei mámecei diga. Daje izói ie emódoidigima jáíi ónoñega. Daje izói afémie jocóinarui ónoñega, ie tíllarui diga. Iemona afémiena comini “Ziñona itímie” daide. Afe Melquisedec comini cigiri illáfuedo Juzíñamui Jitó ziñona cai dibéfodo úriraimana illáfuenta caina fiditate.

<sup>4-5</sup> Mai bífueno ñue omoi coméciri, Melquisedécimo ite jamánomoidifuenta omoi onóillena. Ua Melquisedec, cai nanoide jáiiragima Abraham baimo jamánomoidimie. Mei Abraham ie bairoca ráamona Melquisedécimo fecádeza.

Abraham enaize Jacob doce dígade jitórede. Iemo afe jitóniai cigimona Leví comuídeza. Afémie comini dibéfodo Juzíñamuimo úrillena Juzíñamui nizeda ogámie. Ie jira nana judíuai Juzíñamuimo úriraini Leví úcoidigimamona comuítagaiaioi. Afe Juzíñamui nizeca Leví náiraina, Juzíñamui Moisés ocuica uaido daide: “Nana jáíie judíuai nairai imácimona Juzíñamuimo dúide ráaniaina órediomoi,” daide. Ua Leví náiraimo ibárede, nana

jiáie Israel nairai daa Abrahámona comuídino íadi. Ie jira Leví comini nana afe Juzíñamuimo dúide ráaniaina llínofirediaioi. <sup>6</sup> Mei íadi afe Melquisedec, Leví nairai izíe íeñede. Mei íadi afémie áfena llínoñeniadi afe Melquisedec, Leví emódoidigima Abrahámona Juzíñamuimo dúide ráaniaina uáfueña llínote. Iemona Melquisedec Leví baimo jamánomoidimieza onódicai.

Afe ráaniai ie llínua llezica, Melquisedec Abrahamo úrite. Abraham Juzíñamui íemo ñue finóllifue, uiécodo fidítagamie. Iemo ja birui Melquisedec afémie ñue éziciano daide: “Juzíñamui ona ñue cánoiteza,” daide. <sup>7</sup> ¿Ñibémie mei jamánomoidimiena? ¿Ezicitimie mei nibai ézicigamie? Ua, ézicitimie baimo jamánomoina. Afefue buna jáanoñega. <sup>8</sup> Nane jiáifue llóiticue. Cai cígimona eneno nizeca Leví comini, Juzíñamui íena nano mameca ráaniaina llínofiredino. Mei íadi afémaci fia comíniza tíifirediaioi. Mei jiáifodo afe jiáie llínotimie Melquisedécina mámeciredimie Juzíñamui Cuegáuai daína izói, tíiño caade izóidimie. Ie jira Melquisedec jamánomo báimoidimie. Leví imaci nai Melquisedec jofófeneidino. <sup>9</sup> Iemo jiáifue Levido daírede. Leví Abraham erófene igima. Mei íadi afe Juzíñamui íena eneno mameca raana llínofiredimie jaiái uícodo Melquisedécimo ie uzuma Abrahamdo Juzíñamuimo dúide raana íbade. Daí Leví comini, jaiái uécodo Juzíñamuimo dúide raana Melquisedécimo íbádiaioi. <sup>10</sup> Mei Leví nai jocóñena llezica ie comuílino nai Abrahamo

íteza. Ua Melquisedec ja Abrahamo dúcinaruimo, Leví jocóillino nai jaca ie nanoide uzúmamo ite. <sup>11</sup> Israel náiraimona eneno nizécazie Leví comini. Aféziemona nizeca nanoide Juzíñamuimo úriraima Aarón. Afémie naa ie erófene igímairi comínido Juzíñamuimo úriraini. Ie jira afe úrirainido Israel nairai Juzíñamui ocuilla uáillaina llogáiaioi. Mei íadi nana afe Juzíñamuimo úriraini finócafuiai comini ua zíñona jílloillena figo jínoíñede. Comini comécina Juzíñamui jítaina izói nahí jaícina jóoitañede. Aarón naa ie erófene igímairi finócafuiai figo jínoñena jira, jiáie afémie izóíñede baimo jamánomoidimiena jítáidicai, afémaci méifomo jóonellena. Ua Melquisedec zíñona illa izóidimiena jítáidicai. (Ie jira afe Aarón comini meifo méidoitimiena Juzíñamui jae jino náiraimo cíotate. Afémie mámece Jesucristo. Ua Aarón comini méifomo jóonegamie Melquisedec izóidimie Jesús; afémie Aarón dibéfomo jaináíñede.) <sup>12</sup> Jae afe jaiiai uícomo ite Juzíñamuimo úriraini nana dáanomo jiáiena íaioi méidua llezica, afe Moisés íaioimo ocuica uaillai daje izói jiáifodo méidorede. <sup>13</sup> Juzíñamui Cuegáuai daí daínámie cai Ocuíraima Jesucristo. Afe como jóonega Juzíñamuimo caído úriraima Jesús, Leví nairai ímieñede. Jiáziemona comuidimie. Ie nairai ímilaina jaca nizéñega, Juzíñamuimo comínido úrillena. Ua comini fia fecaca tóica rílleniai naa ráaniai diga Juzíñamuimo izájillena, nizeñegaiaioi. <sup>14</sup> Ñue onóigaza cai Ocuíraima Jesús Judá náiraimona comuidimie. Moisés afe náiraimo Juzíñamuimo úrirainina íllena, jaca lloñede.

15 Afe jiáie como jóonega comínido Juzíñamuimo úriraima Jesús, jino cióillamona, bífuiaina jino uáfodo baimo onódicai; mei dama afémie Melquisedec izóinaza. 16 Bímie dama ie ñue ziiñona ífrenamona comínido Juzíñamuimo úriraimana jaide. Mei jiáifodo Leví náiraimona jaii nizeca Juzíñamuimo úriraini ocuica uai dáinado úrirainina jáidiaioi. Afe uai ñie náiraimona nizéllena llote. 17 Mei íadi como jóonegamie Jesuna Juzíñamui ñue riírede nabáitaja uaido daide:

“Melquisedec izói jaca ninomo Juzíñamuimo comínido ziiñona úriraimana ja birui itíoza,” daide.

18 Iemona afe uícodo ite ocuica uai jae oni caitaca, mei afe uai riínideza. Iemo jiái, aféuai comini comeci nahí duáfuenta figo jínotanideza. 19 Afe Moisés ocuica uai buna comécina nahí jáicina finóñede. Mei jiáifodo jiáie aféuai baimo, ñuera cai jíllotaite úiñoigamie Jesucristo jae caimo cíotaga. Afémiedo Juzíñamuimo áinozifiredicai, uáfodo Juzíñamuimo cai úrillena.

20 Afe Jesucristo Juzíñamui riire nabáirede uaido jóonega. 21 Ie uícodo Juzíñamuimo úrirainina jáidino, riírede uaido jóoneñegaiaioi. Mei íadi Jesús comínido Juzíñamuimo úriraimana jáillaruiimo, Juzíñamui riire nabaica uaido ja daí mameca. Mei Juzíñamui ie Cuegáuaimo Jesudo úrite, daide:

“Cue Juzíñamuidicue. Bifue riire cue nabaica uaido daidicue. Cue comeci faca uai jaca jáíuaina méidoñeiticue.

O ziiñona comínido Juzíñamuimo úriraimana itío;  
Ua Melquisedec izóidimiedio,” daide.

22 Ie jira Jesucristo, Juzíñamui jamánomo ñuera caimo comue finóllifue caina ñue onótate. Ua Jesucristo aféfuemo iere uafue daide. Afe finóllifue Moisés lloga nanoide finóllifue baimo ñuera.

23 Jesucristo uícoidi ruillaimo ite Leví náira imona nizeca Juzíñamuimo úriraini ua aillo ite; mei íaioi tícoizifiren amona jaca jiáimiena méidofiregaiaioi.

24 Mei íadi Jesús cai dibéfodo Juzíñamuimo úrillana, jaca jiáimiena méidonide; mei afémie jaca ninomo zíñona itímieza.

25 Iemona Jesús nana íedo Juzíñamuimo úrizabitinona, jaca ninomo jaícina ñue jíllo tarede, mei afe Jesús, íaioiri Juzíñamuimo zíñona úriraimana íllaza.

26 Ua, afémie izoide Juzíñamuimo comínido úritilla imana jai ai ninómona jitáidicai. Ñue cai jílloillifue afémie caimo ñue zúitaitimie, mei afémie nahí ñuera nífuenidimieza. Afe llezica afémie nana fiénidimaci íaifuemona oni eneno rairuícamié. Ie mei afémie mona ero úcuai illa caifomo, Juzíñamui nahí illánomo uigámie. 27 Jai ai uícomo ite Juzíñamuimo úritillaini nágaruillaído tóica rílleniaina fatá Juzíñamuimo izájifirediaioi.

Nano fueñe dani íaioimo ite íaifue ícoñia áfeniaina izájidiaioi. Afe mei comínimo ite íaifue ícoñia áfeniaina izájifirediaioi. Mei íadi Jesús afe izói fínuana jitáiñede. Afémie dácaño nana comini íaifue ícoñia dama ie abi Juzíñamuimo fecade.

Ua cruzmo ie duere zefuida tíllado abi fecade. 28 Afe Cristo uíécodo lloga ocuíllafuedo llotino, jiáie jamai figo nahí jaícina finótañede comínimona Juzíñamuimo úritillainina mamédiaioi. Mei jiáifodo, afémaci méifomo jóonega úritilla ima Jesucristo,

Juzíñamui ñue riire nabaica uaido jóonega. Afémie jaca ninomo nahí jaicínaitaga Juzíñamui Jitó.

## 8

*Juzíñamui caimo cómuena finóllifue, Jesús caimo jino denódimie*

<sup>1</sup> Nana cai daináfuiaimona llógana bie ñue nahífuena ómoimo llóiticue: Como lloga caimo ñue jóobide caido Juzíñamuimo úriraima birui ja caimo ite. Afémie caifo monamo ite Juzíñamui nabézimo ráinazaide. <sup>2</sup> Dinomo Juzíñamui nahí illánomo Jesús íllamona, jamánomo ñuera Juzíñamui uiécomo Jesús caido úricabite, cai jílloillifue ñue caimo zúillena. Afe Juzíñamuimo cai nahí ánozirano comini finoñega. Jaiai biniemo ite Juzíñamuimo ánoziraco comini niga. <sup>3</sup> Naga Juzíñamuimo úritillaïma, fia iga ráaniaï, tóica ríllenïaï diga Juzíñamuimo fecáfireitimiëna mameca. Ie jira cai dibéfodo Juzíñamuimo úriraima Jesús, daje izói dama ie fécajille raa jitáirede. <sup>4</sup> Biniemo afémie nibai abido ie bia, afémie caido Juzíñamuimo due jiza úriraimañeite, mei Moisés ocuícawai daina izói Juzíñamuimo caido úriraini biniemo nai íteza. Daje izói bimaci nai benó Juzíñamuimo fia fecaca raana íemo izájifirediaioïza. (Ie jira caido ziiño úriraima Jesús, caifo monamo Juzíñamuimo cai ie canólledo úricabite.) <sup>5</sup> Biniemo ite Juzíñamuimo úriraini aillo ráfuiáido nícidotiaioï. Nana íaioï nícidogafuiaï jánana mameide. Iaioï finócafuiáï caifo monamo ite Juzíñamui nahífuiaïna caïna fidítate. Daje izói biniemo ite jaiai Juzíñamuimo ánoziraco,

Juzíñamui nahífueña cai fidítaraco. Afena onódicaiza, mei Moisés afeco nitátaacanaruimo, Juzíñamui íena daide:

“Caifónedumo o illa llezica omo cue ácataga afécona o ciona izói, afe izói jaícina mai o niiri,” daide.

<sup>6</sup> Mei íadi bínemo ite Juzíñamuimo úriraini nícidogafue iere afe baimo, cai caifo monamo ite úritillaíma Jesús caido jamánomo ñúfueña nícidote. Mei jii, afe Jesucristo caimo zuitaca Juzíñamui ñuera cairi comue finóllifue, jaiai Moisés lloga finóllifue baimo ñuera. Mei Moisés ocuica uai baimo, Juzíñamui uícodo lloga cómfue jamánomo ñuera uáimona comuídeza. <sup>7</sup> Afe Moisés lloga nanoide finóllifue, comini jílloillena ñue jinoiadi, jiáie uire iite ñue finolle uai jítaiñeitiaioi. Mei íadi afe naonide uai íaioi jílloillena figo jinoñede. <sup>8</sup> Afe nano ocuica uai jeire otino nahí jaícinaidifue mo figo dúciñediaioi. Dúciñediaioimona, Juzíñamui ie Cuegáuaimo íaioina daide:

“Uire jiáiruido nana Israel náiraimo comue ñue cue finóllifue ócuiticue, naa Judá náirairi.

<sup>9</sup> Jaiai íaioi uzútiaino cue daína ocuica uai izói, ócuiñeiticue.

Jaiai aféruillaído Egipto éniemona afémaci billa llezica íaioina ifódicue:

Ua afémacina izire úcaidicue.

Mei íadi cue lloga ocuica uaina nano íanori fáicanocaillano, áfena figo náfueñediaioi.

Afe jira íaioina zóofeticue,” Juzíñamui daide.

<sup>10</sup> Nai nane íaioina lluanu Juzíñamui daide:

“Uíreitiruillaído Israel imácimo bie izói cue ñue comue finóllifue ócuiticue.



Aféruillaído cue ocuica uáillaina íaioi ifócimo  
jaícina déitaiticue.

Ua aféuaina íaioi comécido jeire íaioina otátaiticue.

Iemona afémacina dama cúeiena nane meine  
abido máiñoiticue.

Afe llezica íaioi nahí Juziñamuina íiticue.

Iemo cue náiraina íitiaioi.

<sup>11</sup> Aféruillaído nana afémaci uáfodo ñue cuena  
ónodiaioiza, cuena íaioi onóillena abi diné  
jiáima llónide.

Iemona ie abi ímiaimo buna Juziñamuina  
onótanide. Daje izói dámie ie ámamo  
Juziñamuina onóillena llóñeite; mei nana  
cuena ónodiaioiza.

Naga jamáimie, íemo jiái naga jamánomoide  
riíredillaíma, nana daje izói cuena ónoitiaioi.

<sup>12</sup> Nana íaioimo cue dúecaillamona íaioi fieni  
finócafuiái ibana óñeiticue.

Nana íaioi comeci íaifuiaina jaca ninomo  
féitaiticue.

Aféfuiaina úbiñoñeiticue,” dinó Juziñamui daide.

<sup>13</sup> Bie méifodo lloga Juziñamui finóllifue, cómofuena  
méiduamona, afe uícodo Moisés lloga finóllifue  
jae jaiáiza feide. Afena Juziñamui daí uáfodo  
llote. Iemo naga jaiái raa zabícaillamona raíre oni  
dotánocaiga; oni dotánocailleza cíóñelle.

## 9

*Bíniemo ite Juziñamuimo áinozirano, jana izói  
jiáie monamo ite Juziñamuimo áinozirano cai fidítate*

<sup>1</sup> Afe nauí nano lloga finóllifue llua llezica,  
Juziñamui íemo áinoziraco nitátate. Afe nitátaja  
dáruido, comini Juziñamuina ióbitalle uaillai

afémacimo daje izói lloga. <sup>2</sup> Afe lloga Juzíñamui mo ánoziraco Moisés nitátaga. Afeco ere niñeno jédaciede iníroina ibáicaco. Afe áreco ero ménaco titaca. Jinóidico Juzíñamui Ñúeco daina. Afeco eromo áillue mechera izoide egáñora ite. Siete diga dájemona boode raa ite. Dáanommo Juzíñamui dibénemo oni enénorie rairuica pan jóonerabani ite, naa afe páaniairi. <sup>3</sup> Afe ánoziraco jofóidico Jamánomo Ñuera Rairuícaco daina. Afe jofóidico daje izói jédaciede iníroina ruica diné eróicana nacona ibaica. Jédaciede jígaroi izóidena fetaca. <sup>4</sup> Afe fetaca jédaciroi abimo uguci jobáirabani ite. Bibani líiaide órona jinófene aifítaga. Bie jofóidico eromo daa áillue ráaniai éenora ite. Cajona eroide. Afe éenoraco nana jinófene órona aifítaga. Afe éenoraco eromo Juzíñamui nofici ibícimo cuega ocuica uailai ite. Ie jira afeco nofíbícimo cuega Juzíñamui cai ocuilla éenuacona mameina. Iemo afénomo daa oro finoína nogo ite. Afégomo ite Juzíñamui monámona cocítaga güille. Afe güille mámeçi maná. Daa afe éenoracomo Aarón jigüida izoide radozi ite. Afe idozi jamai jazicçi radozi óinaza dúididozi. (Zícórede juzítófe izóíñede.) Mei íadi Juzíñamui afe idózina éniemo riñeno, fia táinomona zicótano raire ñue llizítate. <sup>5</sup> Afe éenoraco ibáirabicçi emódomo mena oro finoína Juzíñamui abi imácina eroide jana naidáide. Mei íadi afe íaillinoi íáicórede. (Afe íaillinoi mámeçi ráaimona “Querubines.”) Afe íaillinoi conima uiécomo eróidiaillinoi. Iaillinoi naidaina cígimo Juzíñamui cíocaifirede. Afe Juzíñamuina cíóñenaza;

dama ie abi egáñuana ciófirena. Afénomo faga tóiniaí díena recuífirediaíoi. Daí recuífirediaíoi, Juzíñamui meine abido comínimo dúecaillano, íaioimo ite fiénidifue iba íaioimo óñeilla, ua afe ícoinia íaioina duere finoñeilla. Nana afe dibénemo ite duera nícidogafuiaina ja birui benomo llónide.

<sup>6</sup> Afe ocuica áinoziraco nilla mei, íemo naa ie jofo ero ráaniaíri fínua mei, comínido Juzíñamuimo úriraini jinóidicomo jáifirediaíoi. Afénomo íaioimo ocuica comínido Juzíñamui ióbitalle ráaniaí finófirediaíoi. <sup>7</sup> Mei íadi afe jofóidicomo, dama Juzíñamuimo úritillaíma jáifirena. Aféllaíma naga fimónaíaido dácaíño afeco jofo eromo jáirede. Faga tóiniaí díena jaca jofo úifirede. Dama íemo ite onóñeno finoca fiénidifue ícoinia daí díena Juzíñamuimo izájide. Ie mei nane nana comini íaifue ícoinia jáíe díena Juzíñamuimo izájide. <sup>8</sup> Bífuiaido Juzíñamui Ñuera Joreño daa jáífueña cai fidítaiacade. Afefue daíde: “Baie jinóidico nai illa llezica, jofóidicomo jiba comini jaille nai rairuírede. Ua aféruillaído jofo dama Juzíñamui illánomo jáinidiaíoi. <sup>9</sup> Nana bie Moisés illágimado nícidogafuiaí birui cai onóilla canode. Ua comínimo ácatafirega raa izoide, aféruído Juzíñamuimo ánozillena nigaco, naa afe eromo íaioi nícidogafuiairi, ñue jaícina caina onótate. Biruillaído judíuai aillo faga tóiniaí jáíe fia fecaca raa díga, Juzíñamuimo nai izájifirediaíoi. Mei íadi afe bíedo íaioi comeci Juzíñamuimo ñue jaícina jóitanide, mei íaioi comécimo ite fiénidifuiái

naí féitañegaza, fia ibaica izóí íteza. <sup>10</sup> Nana afe íaíoi nícidogafuiai fia jinófene ífuiai. Nñe izóí íítiaíoi daíde. Dárie íaíoi güille, jirole diga fímaíriffafuedo úrite. Afe izóí fia emódoide múiñuafuedo úrite. Nana bífuiai fia nano nié dino comínimo ocuica, mei Juzíñamui jííifuena méidolliruiamo naí dúciñedeza. Ie jira aféfuiai daa aféruillai íena ráifide.

<sup>11</sup> Mei íadi caído Juzíñamuimo úrifireitillaímo Jesucristo, jae caímo dúcide. Afémiedo ñuera cáimafuiai caímo zúide, mei ua nahí Juzíñamuimo ánoziracomo afémie jaináideza. Afe jaiái bíniemo ite comini niga Juzíñamuimo ánoziraco jaboide. Afécomona caí íóbillafue baímo, Jesucristo jamánomo ñuera jíllonafue, caífo monámona ana caímo zúitaíbite. Afémie afe nahí Juzíñamuimo ánoziracomo dúide; afeco bínie comini níñega. Dama ie nahico monamo ite. <sup>12</sup> Nana comini íena, dácaíño afeco eromo ite jofóidícomo afémie jaide. Ie jailla llezica chivo die, juráreto jiza die diga uiñede; mei jííifodo dama ie die uite. Mei jíí, afémie íaífuenidimiena íllamona, cruzmo caí ifomo tíllano, ie die tótado zííñona caí jíllonafue ote. <sup>13</sup> Jaiái Moisés daina izóí, íaícaíllamie íemo ite íaífue bie izóí muiñórede. Múíñoñegamie Juzíñamuimo dúide comini cígido macánide. Daje izóí afémie Juzíñamuimo nabáirinide. Ie jira faga tóiníai die atírede. Iemo jííie Juzíñamuimo mameca juráreto jiza jobailla afe jízechoma atírede. Ie mei afe íaícaíllamíemo aféchoma júdairede. Iemona afémie íaícaíñegamiena jaide. Mei jínofena muiñócaza. Ja Juzíñamui

comínimo meine abido caimare úrrede. <sup>14</sup> Mei jii, Juziñamui dáinamona afe tóinia die rírede, come jinóidifuemo muiñóllena. Afefue daiítania, ua onódicaiza. Mei Jesucristo die jamánomo rírede. Ua dama afémie ñue nífuenidimienado Juziñamuimo ie abi dama izáibite. Afe ziiño Ñuera Joreño ie cánuado Jesucristo dama ie abi Juziñamuimo izájide. Iemona ie die tótamona nana cai comécimo ite íaifuiaina muiñótate. Ua nana cai jaiáimona nícidogafuiaí caina ziiñona cáatañede. Mei íadi Jesucristo díedo cai comeci múiñua mei, ua ziiñona cáatagacai, afe jaca nahí caade Juziñamui ocuícano ráiruiñeno cai jetállena.

<sup>15</sup> Ie jira Jesucristo jae Juziñamui comue finóllifue caimo jino zúitaitimie. Afémiedo nana Juziñamui nizécano uafue uícomo lloga ziiñona cáimaduafuena maiñóritiaioi. Juziñamui daií nana comini jíllouillifue uícodo mamede, mei dama Cristo tíllado comini fiénidifuiái Juziñamui dote. Ua jiaí uícodo lloga nanoide finóllifue illa llezica, nana aféruimo afémaci fiéni finócafuiái ja birui Cristo tílla jírrari, Juziñamui dote; duano, nana íemo íinotina jíllotate. Daií Juziñamuimo ziiñona caimare nabáirillafue maiñódiaioi. <sup>16-17</sup> Afe maiñórrillafue, come tílla méifomo íitífue izoide. Dámie tíadi ie fiévide feci raa jáimie oni llínoga. Afémie nai tíñenia, feci raa oni llínoitimie minica raana nai llínonide. Ie jira oni llínoitimie íemo dúide raa maiñóllena, afe raa naama tílla jítaírede. Daje izói Juziñamuimo caimare nabáirillafue cai maiñóllena, Cristo tílla jítaírede. <sup>18</sup> Afe

jira jai ai uí codo lloga Juziñamui ñue finóllifue tániaruimo díena recuíñorediaioi. <sup>19</sup> Moisés nana afe ocuica uaillai nana comínimo jino llua mei, afe uaillai cuiábicimo faga tóiniaí díena cuirínote. Daje izói afe mei nana comínimo cuirínote. Ua llua mei, Moisés duera “hisopo” daina raroci llínote. Llínuano, afécimo jáirede oveja itíraína maíte. Iemo jáinoína jaicuica díedo afe rarócina riáitate. Ríaitano, ocuilla uai cuiábici naa comíniri díena cuirínote. <sup>20</sup> Cuirínua llezica Moisés daide: “Juziñamui ómoíena ocuica ie finóllifue bie die uafue daítate,” daide. <sup>21</sup> Daje izói aféruillaído Moisés íaioi iniroi finoína Juziñamuimo ánoziracomo díena cuirínote. Daje izói nana afeco eromo ite Juziñamui íóbifirena raamo díena cuirínote. <sup>22</sup> Ua, Moisés ocuica uai daina izói jamánomo diga raa, díedo Juziñamui dibénemo dua izói ñue finoca. Iemona die tótañegana comini comeci íaifui ai iba jaca órede.

*Cristo dama ie abí Juziñamuimo izájille comini fiénidífuiaína muiñode*

<sup>23</sup> Afe comini niga Juziñamuimo ánoziraco Juziñamui ocuide, naa afeco eromo ite ráaniairi. Iemona nana afeco eromo ite ráaniairi Juziñamui dibénemo ite nahífuiaína jánana cai ciona izói caina onótate. Nana biniemo ite afeco ero ráaniaí Juziñamui illánomo nahí itífuiaí jana. Ie jira biniemo ite ráaniaí dibénemo figura Juziñamui daíllena, bie die recuille jítáirede. Mei íadi Juziñamui nahí illánomo jáifireitino dibénemo,

bie die baimo ñuera Juzíñamuimo fia izájifireille raa jitáirede, afémacina Juzíñamui iere figura daiíllena. Ua tóiníai die baimo Jesucristo jamánomo ñuera die jitáirede. <sup>24</sup> Iemona Cristo tílla llezica, afe Cristo biniemo ite comini niga Juzíñamuimo ánoziracomo eromo jofó jáiñede. Afe bico fia nahico jana. Mei jáífodo Cristo, Juzíñamui nahí illánomo caído úrillena jae cíocaizaide. <sup>25</sup> Afénomo Cristo dama ie abina, diga icaiño meine nane izájíñede. Mei íadi biniemo ite Juzíñamuimo comínido úritillaima, naga fimónado faga tóiníai die uillano, afe Juzíñamuimo jáiraco jofóide iere ñuera rairuíredicomo jaide. <sup>26</sup> Afémaci jáifirena izói Cristo jáifiredena figóñede. Mei nibai afémie daií diga icaiño jáiadi, íemo énie finuaruimona afémie afe izói diga icaiño meine abido tírede; mei íadi afe izóiñedeza. Afémie cai illáruillaido jaiái lloga Juzíñamui finóllifue fuilla llezica, dácaiño fia cómena íficaillano caimo cíocaizaibite. Ua afémie biniemo cai jáinona ie tízaibillado, nana caimo ite fiénidifuiái niné féillena oni dote. <sup>27</sup> Ja onógaza, naga come biniemo dácaiño tíide. Tílla mei, íaiói illafue Juzíñamui jáicina jicánoite. Aféfuena daje izói ñue onódicai. <sup>28</sup> Daje izói Jesucristo, comini fiénidifuiái oni dóllena dácaiño tízaibite. Ie mei uire jáíruido afémie fiénidifuiáina duáibiñeite; mei jaiái ie dógaza. Mei íadi afémie uafue meine dáanomo cíocaizaibite, nana íena izire úiñoidinona jíllotano monamo ie illánomo úillena.

# 10

<sup>1</sup> Mei jaiái Moisés ocuica uai naa ie lloga níciduairi, ico nirui bite caimare illífuiái jana. Afe ie lloga jáiaifue nahífueñede. Moisés bie ico zúitifue cai onóillena jana uícodo llote. Iemona naga fimónaiaido faga tóiniaina íaioi úifirena, íaioi comécina figo jaícina jóitañede. Mei uáfueña, afe faga tóiniaí íaioi úifirena Juzíñamuimo áinozidino nahí íaifuenidinona jáitañedeza. <sup>2</sup> Mei daíí uafue íaifuenidinona íaioi jáiadi, nibai afe tóiniaina izájifirenana fáicanocaidiaioi; mei jiáifodo fáicanocaiñediaioi, nai comécina jaícina jóoneñegaiaioiza. Daje izói áfedo Juzíñamuimo áinozidino comécina íaifueña nahí nífuenidinona jáiadi, nibai jae íaioi fiénidifue izire íaioimo iñede. Mei íadi íaioi fiénidifue jaca izire íaioimo ite. Iemona onódicai, tóiniaí fecáfirena íaifueña figo doñede. <sup>3</sup> Mei íadi afe fatá Juzíñamuimo izájitaga tóiniaina cionamona, comini íaioi fiénidifue naga fimónaiaido úibicaitagaiaioi. <sup>4</sup> Mei jii, juráretuai, chívuaí die diga, jaca come fiénidifuiái dónide. Mei áfemo ua dolle ríino iñedeza. <sup>5</sup> Ie jira Jesucristo bíniemo bíacana llezica ie Moo Juzíñamuina daide:

Omo fia fecaca faga tóiniaina gáíñedioza, comínina iere figura o daíllena.

Mei jiáifodo énie cómena ja cuena jéicitaitio.

Afemona cue tilledo íaioina óiena nífuenidinona jáitaiticue.

<sup>6</sup> Ua comini íaifue ícoinia jobaica tóiniaí ja birui ona ióbitañede.



7 Ie jira ciegánico cuedo úrilla izói birui ona daidicue:

“Moo Juzíñamui benó biniemo o comeci jitáillafue fínuaibiticue,” daide.

8 Nano fueñe afémie daide, nana afe Juzíñamuimo fia fecaca tóniai, íaifue ícoinia jobaica tóniai diga Juzíñamui comécina zuitañede. Ua íena íóbitañede, nana afe nícidogafue jaiiai ocuilla uai daina íadi. <sup>9</sup> Afe emódomo Jesús daide: “Moo Juzíñamui, ja o comeci jitáillafue birui benomo fínuaibiticue.” Daí Juzíñamui nana afe jaiiai ocuica nícidogafuiaina zóofete. Zóofiano, afe méifomo Cristo dama ie abi cruzmo izájillafue Juzíñamui jeire ote, ñue comínimo caimare érocaillena. <sup>10</sup> Daí Jesucristo, ie Moo Juzíñamui comeci jítainafue izói finode. Daí ie fínua mona jae dama Juzíñamui nabaina ñue finócamacina jáidicai. Mei jii, Jesucristo dácaiño jáicina nana cai fiénidifue oni eneno féitate. Mei ninomo féiñe itena cruzmo dama ie abi Juzíñamuimo izájideza.

<sup>11</sup> Naga judío Juzíñamuimo comínido úriraima nágaruillaído naidáillano daje izói faga tóniaina Juzíñamuimo izájifirede; mei íadi afe rilledo comini íaifuiai dónide. <sup>12</sup> Mei jáífodo Jesucristo dácaiño comini fiénidifue ícoinia duere zefuida, tíizaibite, afe izói dáanommo íñeillena. Ie tíilla mei meine abido cáaillano caifo monamo Juzíñamui nabézimo ráinazaide, nana comini íaifue múiñuana fuilla jira. <sup>13</sup> Dinomo, nana ie fairíconi ie anamo íaioi itábicaillena afémie úiñoide. <sup>14</sup> Mei jii, Jesucristo, dácaiño ie Moo Juzíñamuimo ie abina izájide. Afe

izájillafuedo, nñi cruzmo ie tíllamona, nana caina ie nabaina ñue finode. Jae nana cai comeci íaifuenta ñue múiñuano jaca ninomo caimo caimare érocaide.

<sup>15</sup> Aféfuemo Juzíñamui Ñuera Joreño uaina nabáide, iere uafue cai daiíllena. Ñuera Joreño Cuegáuaimo daide:

<sup>16</sup> Juzíñamui daide: “Uire jíáiruillaído cue comínimo bie izói jíáie como cue finóllifue llóitícue, naa jíáie cuemo ínotinori.

Aféruillaído cue ocuica uáillaina íaioi comécimo jaícina onótaitícue.

Ua afe uaillai íaioi ifócimo ñue jino denótaitícue,” daide.

<sup>17</sup> Ie mei nane emódomo daide:

“Nana íaioi fiēni finócafuiāi ibana otátañeiticue.

Daií oñena llezica, íaioi comécimo ite íaifuiaina jaca niné féitaredicue.”

Dinori Juzíñamui daide. <sup>18</sup> Nana comini fiēnidifuiāi daií dua mei, jíāi íaifue ícoīnia dóllena fatá fecaca tóīniāi jae jítaiñega.

### *Juzíñamuimo cai áinozillena jítáirede*

<sup>19</sup> Iemona, ámatiai, cácarei. Jae Juzíñamuimo cai jáillio uáfodo túide. Ua ie nahí illánamo, afe iere ñuera rairuícacomo caimare jacíruiñeno íemo úrizairedicai; mei Jesús cairi tíizaibillano caina Juzíñamuina éoitadifue oni muiñócaza. <sup>20</sup> Afémie tuiñoaca io ñuera rairuiredico jédaciede ibáiraroido joide. Jira Juzíñamui illánomo cómena cáataite comue io Jesús tuiñuano, afe iodo afémie caina ifode. Afe io tuiñóllena dama ie abí izi cácatate, íemo cruzmo duere zefuírede. <sup>21</sup> Iemona Jesús nana

Juzíñamuimo ínotinodo Juzíñamuimo Uritillaimana

jae jaide. <sup>22</sup> Afémie ja cairi úrioinamona, mai Juzíñamuimo jacíruiñeno omoi áinoziri, mei íemo ñue cai ínuamona jae meáiruiñedinona mamécacaiza. Ie jira jífuenide comécido, mai omoi áinoziri. Ainozillano, mai íemo caimare cai úrilli. Ua táinona lloñeno mai íemo comeci cai facalli. Mei nana cai íáirede comeci ícoinia afémie jae jaícina oni féitagaza; ua come abi ñue jáinoido jocoina izói comécina muiñócacai. <sup>23</sup> Afe uáfodo jino comínimo cai lloga Juzíñamuimo caimare cai úrillafuena, mai fáicanocaiñeno áfemo izire cai ínofireilli, mei afefue caimo llotímie Jesús jaca ínofiregamieza. <sup>24</sup> Daje llezica illa dígamierie, mai conímamo ñue cai comécilli, conímama cai izíruillino cai jenóllena. Daje izói jíáimana ñúefuina rairuiñeno jíeruillinona jenóredicai. <sup>25</sup> Daje izói omoi Juzíñamuimo gairífirenafuena mai féitañeno iri. Dáarie aféfuena féitafirediaíoi. Daí illa fiénide. Mei jíáfodo, Jesucristo meine billirui raire dúciacanana omoi onónamona, mai conímama ñue úrillauaido comécina caimare cai náireitalli, nana cai ínogafue féíñellena.

<sup>26</sup> Juzíñamui llogafue daide: Jaca dama Jesús túillamo cai ínuamona jílloredicai. Aféfuena cai ie onótaja mei, mei íadi afe uaina nai cai ruifíruioiadi jae abi dine jíáie cai íaifue múiñoitena íñede. <sup>27</sup> Daí ruifíruioidimacimo jamánomo izire jácifue zúite, mei Juzíñamui duere íaíoi finóllifuemo jae ánozideza. Afémie iere íaíoi mo ríicaillano iere boode jíáfodo joide iraimo íaíoi na duere zefuítate. Ua nana Juzíñamuina bacáuairedinona irai amena cuarita izóidemo,

Juzíñamui íaioina dīnomo zīñona duere zefuítate.  
<sup>28</sup> Moisés ocuica uaina ruifruitimiena raire titádiaoi. Ua, mena nibai daámani uai nabáiraini daina uáimona, íemo dúecaiñeno íena titádiaoi.  
<sup>29</sup> Mei Moisés ocuica uaina ruifruitimiena daí duere finóbiteza, Juzíñamui Jitona ruifruitimieno jamánomo izire duere finóllifue, afémiemo zúiteza. Afémie Jesús díena jámairuitimie. Afe tíillamo totaca díedo, afémie nauí dácaíño Juzíñamuimo oní eneno nizécamiēna jaide. Mei íadi Jesuna ruifruitimie caimo dúecaifirede Ñuera Joréñona iaire daífiredimiena jaide. Daí ítimiena iere Juzíñamui duere finórede. <sup>30</sup> Ja birui daí ítimie fiénidifue iba ófiredimiena onódicai, nímie cai Moo Juzíñamuina. Afémie daide: “Afe iba ófiredimiedicue. Ua nana íaifuiái ibana duere finótafiredimiedicue,” dáideza. Jiáinomo Juzíñamui Cuegáuai daide: “Juzíñamui ie comini comeci ífueña jáicína jicánoite. Jicánuano íaioimo dúide duere finóllifue ócuite,” daide. <sup>31</sup> Daí ie úrillana cai onónamona, caade Juzíñamuimo duere finóllena izájina jamánomo jacírede.

<sup>32</sup> Mei íadi nauí íanori omoí illáfuemo uibíoiri. Aféruimo ñúefuēna omoí onona mei, aillo duere zefuídíomoi, mei íadi aféruimo omoí ínogafue fáicanocaiñeno ñue ocuídíomoi. <sup>33</sup> Dáruillaído uáfori comini eróicana báíñuano duere finócaomoi. Jiáiruillaído daí finócamacimo omoí nabáillamona duere zefuítagaomoi. <sup>34</sup> Afe llezica llaveca ámatiaimo dúecaifiredíomoi. Afe baimo, ómoimo ite ráaniaina jiáimaci báiruana caimare rairuíñediomoi, mei onódiomoiza, bíniemo ite raa

bairno, jamánomo ñuera jaca bairónide raa ómoiena monamo íteza. <sup>35</sup> Ie jira naui izire omoi ñnoga uaina mai birui omoi féitañeno iri. Aféuaina ñue omoi ñnofireiri, mei ícoimo iere ñuera jirídogo ízoide raa máíñoitíomoiza. <sup>36</sup> Juzíñamui jítainafuena omoi jíeruilla llezica raire comeci járidoñeno írediomoí. Ua, omoi ñnoga ñúefue, omoi are jaícina llocana uille mei, Juzíñamui uícodo lloga caimare jíllonafuena máíñoitíomoiza. <sup>37</sup> Mei jii Juzíñamui Cuegáuaimo daide:

“Ja íanori íllamona, uícodo lloga bíitimie Jesucristo, jízíñeno raire dúcizaibite.

<sup>38</sup> Afémie nai biñena llezica, nífuenidena cue mamécamie, cuemo ie ñnuado nágaruillaído caimare ie illano, cuena íóbitaite.

Mei íadi afémie afe ie ñnoga uaina meine abido féitaiadi, afémieri íobiñeíticue,” dinó Juzíñamui daide.

<sup>39</sup> Mei íadi meine abido féitatinó dibénemo jaináíñedícaí. Afémaci daí íaiói ñnoñenamona jílloñeítiaíoi. Mei jiaífodo cai bie Jesucristomo ñnotínodícaí, daí dani cai jíllotagacai.

## 11

### *Juzíñamuimo cai ñnuafue*

<sup>1</sup> Mei ¿mínica ñnuafuena? ñnuafue Juzíñamui daína uaina jeire cai uafue. ñnuamona cai úiñoga cáimafue jeire cai ollínona onódícaí. Daje izói Juzíñamuimo ñnuamona, ie lloga cáiena mameca ñuera raa ciónena íadi, afefue ua íllana comécido ua onódícaí. <sup>2</sup> Ua, ñnuafuedo judíuai jaiáidígimamona

Juzíñamuimo jaináidimiai, Juzíñamui comeci jítailamacina jáidiaioi.

<sup>3</sup> Juzíñamuimo cai ínuamona, Juzíñamui ie úrilla uaido bínie fínuana onódicai. Daií ie fínuado nana bie cai ciona énie, táinomona Juzíñamui comúitate. Ua, minícana iñédeza cióñena ráamona naga ráaniai comuíbicaide.

<sup>4</sup> Juzíñamuimo ínuano Abel, Caín fecaca baímo, ñuera Juzíñamui ióbitalle raa fécaibite. Iemona Abel Juzíñamui dibénemo jaícina itímiena jaide. Juzíñamui jiéruigamiéna jaide. Mei Juzíñamui Abel fécaibiga raa llínuamona, Juzíñamui comeci Abelna jítainana onódicai. Daií Juzíñamui íena jiéruillafuedo Abel jaícinaidífueмо Juzíñamui uai nabaide. Afe Abel, jaiái uícodo Juzíñamuimo ie ínuado ñue illáfuedo jaide. Aféfuena cai fídiamona, afémie titácamié íadi, ie ínogafue, úrillauai izói caímo úrite. “Juzíñamuimo ñue cai ínolli,” caina daide.

<sup>5</sup> Iemo Enoc Juzíñamuimo ie ínuado tííñeno caífo monamo uiga. Daií tíillana ie ónoñeillena, cáanori monamo Juzíñamui uiga. Afe mei afémie bíníemo cióñenamie, mei afémie Juzíñamui úigaza. Afémie nai úíñega Juzíñamui ióbitadímie daínámie. <sup>6</sup> Mei jii, Juzíñamuimo cai ínoñenia jaca íena ióbitanidicai. Dáamie Juzíñamuimo áinoziacania, Juzíñamui nahí illánona uícodo ie ínolle jítáirede. Nane íemo nana izire íena onóiacadino, ñue íbana dama ie abí ífuena íaíoina onótaité. Aféfuemo uícodo daje izói ínorediaioi.

7 Daje izói Noé, Juzíñamui lloga raire biite nai cióñena duere finóllifuenta fídiano Juzíñamuimo ñue ñnote. ñnuano áillue jofóredicae finode, áfedo nana dama ie comini daí jílloillena. Noé daí dama Juzíñamuimo ñnuado, nana jíáie ñnoñede comínimo duere finótatiuai jino íaioimo llote. Afe izói Juzíñamuimo ñnuado Juzíñamui comeci jitaina nífuenidimiena jaide.

8 Afe mei jaiáidiruimo Juzíñamui Abrahana jírite, jíáie éniemo jaiánillena, áfeniena ico jíáiruido íeiena maiñóllena. Abraham Juzíñamuimo ñnuamona afe jírilla uaina cacáillano, raire ie illániemona oni jíáinomo jáizaide, ie dúcillino nai ónoñega íadi. 9 Abraham nai Juzíñamuimo ñnuamona, Juzíñamui íemo fecáacaiga éniemo fia jícánemiena diga fimona fia ite. Ua, ñiroi niina úcaifirega jofomo aféniemo are íoide. Daje izói Abraham comuítaga jító Isaac, dinómona Jacob diga afénomo daje izoide ñiroi nillácuaimo are itíallinoi naa ie comíniri. Juzíñamui daje éniema fecalle uaina Abrahamo llua izói, afe íaillinoimo uícodo llote. 10 Ua Abraham afe jamai illácuaimo dama íeieñede éniemo caimare íoide. Afémie caimare ite, mei Juzíñamui dibénemo ite caimare táinocaitanide illínomo dúcillena afémie úiñoideza. Afe caimare illico Juzíñamui mamérrillano dama ie uaido niga.

11 Daje izói Abraham ai, Sara, Juzíñamuimo ñnuamona, jamánomo jónaite íadi, fueñe úruerena ríino ote. Iemona daa jító jocode, mei Juzíñamui aféngona aféfuena uícodo daña uai, afengo iere ñue

ínnoteza. Afengo bie izói daide: Bímie ie daína uaina jáifo méidofinidímie. <sup>12</sup> Iemona Abraham iere jónaite íadi, iere aillo erófene igímaiaína jebuítate. Ua jamánomo diga nairai jebuide; nái ja lloga monamo ite facádonide úcuai izói itíaiói. Nane monáillai fuédamo ite facádonide guamai izói jebuídíaiói.

<sup>13</sup> Nana cai lloga comini Juzíñamuimo nai íaiói ínoina llezica tídíaiói; nana Juzíñamui uícodo lloga ñúefuiaina nai llíñoñediaói, tílla. Mei íadi afe lloga ñúefuiái ico jíáiruimo zúillena jícana fidídiáiói. Fídiano caimare aféfuemo ínuno comécíidiáiói, mei bínemo ónoñega jicánemacina íaiói illa raire méaicaiño llotíaióiza. Uáfueña bíniedo jaiánicana jáidiaói. <sup>14</sup> Nana daí llotino, dani íaiói nahí illínomo íaiói jáiacanana llotíaiói. Ua jíáie éniemo jáillana íaiói úiñoínana caina fidítate. <sup>15</sup> Daí íaiói dánamona, mei níbaí jaiái íaiói illániemo comécíidiáiói. Daí íaiói comécíiadi diga icaiño meine abido afénomo jáirediaói. Mei íadi abido afénomo jáiñediaói. <sup>16</sup> Mei jíáinomo comécíidiáiói. Jíáie jamánomo ñuera illánomo, monamo ite Juzíñamuimo nabáirizaillinomo izire úiñooidiaói. Daí Juzíñamuimo íaiói ínnoamona, Juzíñamui iere ióbite. Bie jaiánicana jáidino Juzíñamuina dáidi: “O cue Juzíñamuidio,” daí íaiói dánari Juzíñamui méaicaiñede. Mei íaiói jofue izoide ñuera illino, dinomo Juzíñamui diga ziiñoa nabáirizaillena, Juzíñamui jae finócaza.

<sup>17-18</sup> Naui Isaac jocoina llezica Juzíñamui Abrahana daide:

“O úicoitígíma bie jító Isáacimona aillo



jébutiaioiza,” daide. Diga iruillaí íllamona Juzíñamui dáaruimo Abrahana ínuafue facátate. Iemo Juzíñamui ocuilla izói, Abraham nai Juzíñamuimo izire ínuano, ie jító oni uite, titada Juzíñamuimo fecállena. <sup>19</sup> Mei Abraham Juzíñamuimo ñue ínuano comeci facade: “Juzíñamui jamánomo ñue ríinoredimie; tíide come meine cáataite ríino íemo ite. Cue jító tíidena Juzíñamui meine íena cáatarede,” daíí Abraham comeci anado daide. Iemo, Abraham ie jítóna fáiacana llezica Juzíñamui afémiemo raire úrillano, ie daade jítóna jíllotate. Abraham ie jítóna fañede. Ie jira jááifodo daíírede, tíillanomona Abraham ie jítóna meine abído ote.

<sup>20</sup> Daje izói Juzíñamuimo ínuamona Isaac ie jító íaillinoí Jacóbomo Esaú diga uire Juzíñamui orelle caimátaillifue ua llote.

<sup>21</sup> Daje izói Juzíñamuimo ínuamona Jacob, ie tíizairuimo José jító íaillinoímo úrite. Urillano ie enaize íaillinoímo uire Juzíñamui orelle caimátaillifue jino llote. Afe llezica ie macara jigüida llínota ie abi mozíñuano caimare Juzíñamuimo úrite, ie íóbitallena. <sup>22</sup> Daje izói Juzíñamuimo ínuamona José ie tíizairui ánozillano, Israel comini Egipto éniemona uire oni daní íaioí éniemo jáillifue llote. Afe llezica ie ícuruai aféniemo fiéñeno oni úillena, uícodo uai íaioímo jóonete.

<sup>23</sup> Diga fimona jailla mei, Egipto ríillaima nana Israel como jéciga jítótiana fazítate. Mei íadi Moisés jocoina mei, ie moo íaillinoí Juzíñamuimo

ñnuamona, illáimana jacíruiño Moisen a retáidotiaillinoi. Dauíamani íena retáidotiaillinoi, afeza iere ñúezana jira. <sup>24</sup> Aféllaíma jiza Moisen a náamataja mei, Moisés móonaila llezica Moisés aféngomo dúillana ruifíruite; mei afémie Juzíñamui dibénemo jaináideza. Ie jira Juzíñamuimo ñnuamona Moisés afe mámeçi oni faite. <sup>25</sup> Mei jáífodo Juzíñamuimo jaináidino cígiri íllana, afémie jamánomo gaide, nana duere zefuúdiaioi íadi. Daje izói ie comínina fienu ie zóofiamona raire féite jabo íóbillafue dibénemo íllana afémie gáíñede. Moisés Juzíñamuimo ñnuano ñue coméçide.

<sup>26</sup> Bíedo afémie coméçide: “Nana Egipto énie ebírede ráaniai baimo, Juzíñamui dibénemo ie dámie illa jamánomo ráífide, duere afémie zefuide íadi.” Afémie daí comeci facade. Ua Moisés, Cristo ícoína zefuúllano, féitaño daí coméçioifirede; mei Juzíñamuimo ñnuamona baimo ñuera féinide raa izóidifue afe ie jírídollena afémie onódeza. <sup>27</sup> Iemona Moisés Juzíñamuimo ñnuamona, afe Egipto illáimamo ite rínona jacíruiño Egiptomona botade. Ua jacíruiño afe Moisés oni jaide, mei buna cíóñena Juzíñamuimo fácanocaiño ñue nágarui coméçifiredeza. Daí ie coméçinamona, úido cíónamiemo ñnua izói, Moisés Juzíñamuimo iere ñnote.

<sup>28</sup> Daje izói Moisés Juzíñamuimo ñnuamona, Juzíñamui lloga pascua rafue como fueñe finode. Ua Juzíñamui llua izói, Moisés íaioi jofóniai naze fuédamo oveja díena jíritate. Daí finuamona, Juzíñamui oreca títaite abi ímie nana Israel nano

fueñe jococa jitótiaiaimona buna titáñede, aillo Egipto imaci jitótiaí tícoizitiaioí íadi. <sup>29</sup> Daje izói Juzíñamuiño ñnuamona nana Israel aillo comini “Jíairede” daína monáillai ñue zaférede iodo ruícafenemo jaitádiaioí, mei afe monáillai jainoi Juzíñamui oni gaitácaza, íaioí ruica jáillio tuñóllena. Mei íadi Egiptomona racádino afémaci jailla izói jáidiaioimo, meine io jáinoína íbábicaillari coróbaitaioí.

<sup>30</sup> Iemo Israel comini Jericó jofue anáfenoacadiaioí. Afe jofue riire naidároga nofíbanina cirínoga. Iemo Juzíñamuiño ñnuamona ie daína izói, siete dígarui afe riire íbaica jofue jinófenedo ífoína macáoidiaioí. Iemona ícoí iruimo afe caífo nitaca nofici finoína jofue jinófene cirínuabani, Juzíñamui ana éniemo caitade. <sup>31</sup> Daje izói Juzíñamuiño ñnuamona nauí uícodo fiénidíngo, Rahab fañega, nana jíáie afe jófuemo ite ínoñedino fazícaicioí íadi; mei Juzíñamui comínimona oreca éniéna ñue onóillena méiñoitínona afengo caimare cánuano jofo uáidoteza.

<sup>32</sup> Nai jino lloñega aillo ite jíáie jaiái Juzíñamuiño ñnofiredino. Bibedo íaioí illáfuiaina cue llóllena cue abí juánideza, nana llónidícue. Fia íaioí mámeCIAÍ jino llóitícue, íaioimo omoi ñue coméCIOillena. Afémaci Gedeón, Barac, Sansón, Jefeé, David, Samuel; daje izói Juzíñamui uai jino llóraini ite.

<sup>33</sup> Bimácimona dámierie Juzíñamuiño ñnuamona jíáie náiraina anáfenodiaioí. Jíáimaci Juzíñamuiño ñnuano Juzíñamui jaícina jóidífuenta comínimo

ocuide. Dáarie Juzíñamuimo íñnuamona ie uícodo llua izói, Juzíñamui canócaiaioi. Dáarie Juzíñamuimo íñnuamona riírede jánallarillai fuena ibaica izói finode, íena íaioi riñeillena. <sup>34</sup> Jiáimaci uzírede iraimo dotácaiaioi ia, nai Juzíñamuimo íaioi íñnuado afe iráimona uzíñeno jino bitíaioi. Dáarie Juzíñamuimo íñnuamona fuiríllafuiaimona otábiñeno jino ñue jíllodiaioi. Iemo jóbairo illa llezica Juzíñamuimo íñnuamona dáarie maíriñedimíai ñue márimíaina jaide. Daíí Juzíñamuimo íñnuamona onina bite fuirírainina abído rainódiaioi. <sup>35</sup> Daje izói Juzíñamuimo íñnuamona dáarie ringóniaimona íaioi úruiai tíide íadi, meine abído íaioimo cáataga.

Mei íadi jiáimaci nai Juzíñamuimo íñnua llezica, íbátarede tíide jíllotafuena lloñédiaioi, mei aféfuedo Juzíñamuina jáanotaiticai, daidíaioi, íadi Juzíñamuina jáanotanidiaioi. Ie jira iere duere zefuítano titácaiaioi. Daíítadena lloñédiaioi; mei afémaci meine abído caana mei, jamánomo ñuera zíñona illáfuea méaicaiñeno maíñoacadiaioiza. <sup>36</sup> Nai jiáimaci Juzíñamuimo íñnua llezica, fiénide zánonafuiaimona duere finóbidaioi. Jiáimaci riire zechénogaiaioi. Ua dáarie Juzíñamuimo íaioi íñnuamona cúinajano llavécaiaioi. <sup>37</sup> Daje izói jiáie Juzíñamuimo íñnotino nofíciaina níjicaiaioi; jiáimaci dáafemiáido amena dera izóidedo ñetácaiaioi; jiáimaci caimare taino uáillaído bífuegaiaioi, íaioi íñnuafue facátallena, íemo lloéfaido fagáiaioi. Jiáie Juzíñamuimo íñnotino, íaioi iníroinina jira, tóica rille igórainna jítaíodiaioi.

Daií fia macáoidiaioi, mei jofónidiaioiza. Ua iere ráanidiaioiza. Ie emódomo duere zefuítano iere fiēni finócaiaioi. <sup>38</sup> Daií finócaiaioi íadi, Juzíñamuimo íaioi íinogafuena fáicanocaiñediaioi. Iemona bimaci Juzíñamui dibénemo iere izíruigano; mei íadi bínemo ite íinoñedino afe Juzíñamui uaina jeire otínona jámairuitiaioi. Ie jira ínotino afe íinoñedimaci cígiri íllena, íinoñedimacimo figo dúíñede, mei íinoñedimaci comeci iere íáiredeza. Ínotinona jámairuillano, íaioina oni jíúfirediaioi. Iemona ínotinomona dáamierie zaféredizicimo jáidiaioi. Jáíimaci caifóneduai illánomo botádiaioi. Iaioi jaillánomo ite ífuaimo ífirediaioi, naa íduai ana ífuairi. <sup>39</sup> Nana bimaci Juzíñamuimo ínuamona, ñue “figora” daínamacina jáidiaioi. Mei íadi nana Juzíñamui uícodo lloga caimare ñue illífuiaina figo maiñóñediaioi; jabo maiñódiaioi. <sup>40</sup> Mei Juzíñamui jae uícodo cai canolle jamánomo ñuera cáimaduafue mamédeza. Afe jamánomo ñuera cáimaduafue Jesucristodo cai nahí cai jíllóillífue. Daií jaiāi ua Juzíñamuimo ínotino naa cai diga, birui dáanomo jaiāi Juzíñamui mameca nahí jíllóillífue mo dúciiticaí. Ua afémaci naa cai diga, Juzíñamuimo caimare nabáirillafuena jeire óiticaí.

## 12

### *Jesumo ñue jáícina omoi comécioiri*

<sup>1</sup> Ie jira, cue ámatiaí, comécido ñue omoi facari. Ua aillo jamánomo Juzíñamuimo izire ínotino bínemo cai uícodo macáoidiaioi. Afémaci Juzíñamui cai íóbitallífue na caina ífode. Afémaci cai

ñnogafuemo jaícina ífoite uai nabáiraini. Cai abido ífoina itíai. Afémacimo cai coméciamona, nana cai jízitacana uite fiénidifuiái mai oni cai féitalli. Ua, caimo ite fiénidifue, abi llótaidote iniroi izói caimo jíide. Jínamona jaca caína aruire itátate. Afena fáicanocaillano, Juzíñamui ióbitallifuemo zefuiruiñeno mai izire cai nícidolli. <sup>2</sup> Afe llezica duere cai zefuillano féitano, mai Jesumo comeci cai facalli; mei afémie Juzíñamui ióbitalliodo, ñnuafuedo cai jáillena cai ifódimeza. Mei afémie ie Moo Juzíñamuina féitaño ie fáainaruimo nai íemo izire ñnoide. Daí ie ñnua, afémie izói jaícina cai ñnollena, afémie cai ifode. Iemona afémie cai ñnogafue ñue ícoimo fuitádimie. Ua, Jesús duere zefuide, íadi afe duere zéfuilla méifomo íite cámafuemo, afémie ñue comécide. Afemo comécioillano uái dáí cruzmo tízaide; mei áfedo nana íemo ñnotino caimare jíllobicaitiaíza, afémie onode. Iemo afe meáirede tíllana náfuéño, abido meine cáadimiena jaide. Afe daí jaillano caífo Juzíñamui nabézimo Jesús ráinazaide.

<sup>3</sup> Ie jira, cai jíáinona duere zefuítagamie Jesumo mai ñue omoi comécioiri, omoi duere finóbicaillamona omoi zefuiruiñeilla. Daje izói Jesumo ñue omoi uibíoiri omoi comeci ñue náireilla. Mei afémie fáicanocaiño Juzíñamuimo ñnoicaide, fiénidino íena uáitajano duere ie finódiaí íadi.

<sup>4</sup> Fiénidifue omoi comécina jírioido, íadi nágarui áfemona abi ráiruifirediomoi. Afemona abi rairuillano iere juárede. Iemona jabo duere finócaomoi. Mei íadi fiénidifueno omoi

anáfenocanamona nai tíñediomoi. Dama Jesús ícoinia jabo duere zefuídíomoi. <sup>5</sup> Afe llezica Juzíñamui caimare llogáuaina nibai jae féitatiomoi. Aféuaido Juzíñamui ie úruiaí izói, ómoína llófuete; ona riire daide:

“Cue jító, o Ocuíraíma Juzíñamui omo oreca duere zefuítajafuena jámairuiñeno iri, mei áfedo afémie ñue ona rairuillano lletádeza.

Daje izói fiēni o fínuamona afémie duere o finóadi, comécina ríinidimie izói iñeno iri.

Mei jáífodo, abi mámano, ie llétafuena ñue jeire oíri, ñúemiena o jáilleza.

<sup>6</sup> Mei Ocuíraíma Juzíñamui nana ie izíruiganona fáicana lletáfíredeza, íaifuenidinona íaioi jáillena.

Afe izói nana ie ua onoiga jítótiaína llorebai mailla izói due ízitate, mei afémaci dama íeieza,” daide.

<sup>7</sup> Omoína izíruillamona Juzíñamui afe daíí ómoína duere zefuítate, ómoímo llófuellena, baimo ñuera ie jítótiaína omoi jáillena. Ie jira duere zefuítagaomoi. Mei onódiomoiiza, bíniemo ite moo llétañega jító ñue móonaiñeiteza. Iemona afe moo nana ie jítótiaína llorebai mailla izói ízitate. <sup>8</sup> Ie jira Juzíñamui ízitañegamie nibai ie nahí jítóñedeza, móonidiza; mei nana nahí ie jítótiaí izi cácatagaiaioiza. <sup>9-10</sup> Afe emódomo cai bíniemo ite móotiaí nauí ñue cai móonaillena, ñue comeci íaioi fácamona, izire caina lletádiaioi. Ua nano íanori illáruillaído caina duere fínuafuedo lletádiaioi. Ua izi cácatagacai. Afe llezica nai cai moona caimare jacíruiticai; jacíruioillano ñue íaioi anamo itábicaidicai. Daje izói cai monamo ite

Moo anamo jamánomo caimare itábicairedicai; mei afémiemo cai ínuano, nahí ie jitótiaina comuítagacai. Nana aféme duere cai fínuafue cai dibénemo aillo ráifide, aféme ebire ñuera illa izói, daje izói cai íllena. <sup>11</sup> Ua, ja onódiomoiza nana izi cácatafuemo illa llezica, áfena gáíñedicai. Mei íadi afe izi cácatafue záilla mei, áfedo lletácano, Juzíñamui anamo ñue jaícina íficaillano, comécina jacíruiñedinona caimare jáiticaí.

*Juzíñamui uaina ruifruilla iere jacírede*

<sup>12</sup> Juzíñamui daí omoi llétajana omoi onónamona, mai abí omoi mame. Ja abina náinidino izói omoi íñeno iri. Omoi zúurede comeci náiretari. <sup>13</sup> Afe llezica omoi duere zefuúllafuemo, mai bífuemo jaícina comeci facádori. Aféfuedo daíri “Juzíñamui íóbille jitótiaina móonaitagacai.” Daí o dáinamona, jáie ómoimona Jesumo ínogana féitaacadino, comécina caimare náiretaitio. Daí ie náireillamona aféme meine abido Jesús uaina izire ínocana jeire óite.

<sup>14</sup> Afe emódomo nana comíni cígiri, mai comeci ríicaitañeno cáimafuemo omoi iri. Daje llezica, Juzíñamui ebire ñue illa izói, afe dibénemo mai omoi abi ífuiái nágarui médocana uiri. Bie izóidifuemo omoi nai íñeniadi jaca buna Juzíñamuina cíóñeille. Mei íadi comeci íaininafuemo cai íadi, íena cíoiticaí. <sup>15</sup> Juzíñamui caimo fecaca cai ie cánuafue aillo ite. Bifue nana jeire omoi ófireilleza izire omoi coméciri. Daí íllamona buna fiénidifuemo oni nibéfodo báíñeiteza. Daa daí oni fiénidifue dibénemo



baíðimie nana jáiimaci comécina fiēni finode. Mei jii, duere zefuállamona Cristo dibénemo figo jaináiacañedimie, jucúrede juia izoide. Mei afe juia illemo totáa, nana áfeji jucúredijina jaide. Daiítade come nana ie aino comínina daje izói figóruiñede. Afemona abí omoi rairuiri. <sup>16</sup> Daje izói nana jiruírenafuiaimona abí omoi rairuiri. Afe llezica ómoimona dámie Esaú illa izói iñeno iri, mei afe Esaú jaca Juziñamui jítainafuemo figo coméciñedeza. Aféfuena jámairuillano, afémie nánoramie íadi, íemo ite maiñórrille ríino, fia due jiza güille ibana fecade. <sup>17</sup> Afe Esaú illáfuenta ñue onódiomozza; mai aféfuemo omoi coméciioiri. Ico íirairuimo ie moo ézicirafuena Esaú maiñóacade, íadi ie moo ja íena ruifíruite. Afémie comeci ifue méiduano écana ie moomo izire jicade; íadi “Jii” daiñede. Afe nauí Esaú jámairuillafue jaca méidonide.

<sup>18</sup> Ja birui Juziñamuimo caimare nabáirillanomo dúcidiomoi. Jaiái Juziñamui comini áillue caifónedumo áinozidiaioi, Juziñamui daina uaina cacáillena. Afedu mámeçi Sinaí. Afedu náaduna irai izói boode, aillo úillie daga. Afe llezica iere jacire nairíbicaide. Nairíbicaillano, jairifo riire jaiñode. <sup>19</sup> Aféruimo bainada izoide ficire cácaide. Afe llezica áillue come úrilla uai íaioimo ficire cácaide. Afe uai iere jacirede cacaide. Afemona, áfena cacáðino jáie emódomo lletara uaina llóñellena izire jicádiaioi. <sup>20</sup> Afe íaioi cacana íaioimo lloga lletara uai jamánomo iere juáredeza. Aféuai daide: “Bie óode íduna omoi jetáiñeno iri. Ninena daa rille bídumo bíadi, raire noficiado fáiri. Daje izói ninena bídumo bite come fáiri,” daide.

21 Uafue, afe cacánafue naa cíocaidifue diga iere jacírenamona, dama Moisés uai ua: “Aferi iere jacínaiticue. Jacíruillano cuidíriticue,” daide.

22 Mei íadi, jae jíáfodo Jesucrístomo omoi ínuamona, ja birui Juzíñamuimo ite jacínide caimare nabáirillafue dibénemo dúcidíomoi. Ie mei ícoimo monamo ite jaca caade Juzíñamui uícomo úrizaitíomoi. Juzíñamui illa jofue, “mona ero ie Jerusalén” mámecirede. Iemo jíáfodo “Sión Caifónedu” daína. Afémiemo ja omoi caimare nabáirillamona diga íeza facádonide Juzíñamui abi imaci Juzíñamuina íóbioicana íráizítiaíoi. 23 Ua, omoi ínuamona Juzíñamui ómoína daide: “Ja cue daade Jitó Jesucristo izóidínodíomoi. Cuemo ie dúina izói, afe izói ja cuemo jaináidíomoi,” daide. Afemona nana Juzíñamui íena comuítagamacimo jae jaináidíomoi. Nana afe íemo jaináidíno mámeciai jae monamo cuega. Ie jira nana Moo Juzíñamui íe comuítaganona, ñue jícanuana fibídímie izói, ñue íaíoi ríidoite, mei afémie nana nairai Mooza. Jaiai íe anamo ñue itino, jae tíidiaíoi, mei íadi íaíoi ñuera joreño nai figo caimare íñédiaíoi. Ja biruállaido Cristo cairi tíillano caina jíllotate. Daí nana íemo ínotínona jíllotano, afe tíidino ñuera joréñuai ñue jaícina caimare itátagaiaíoi. 24 Uafue, Juzíñamui comue caimare caimo fecállifue caimo llóiacade. Afefue caimo lluáíbitímie Jesús, mei íe cruzmo íe die tótajado caimare íaífuenidínona finócacaíza. Ie jira íe die, úrilla uai izói jamánomo ñúefue cai ífócimo denode. Mei jíáfodo Abel die tóilla afe izói caimare ñúefuiai caimo lloñede.

25 Nana bie caimare Juziñamui caimo llotátagafuiaina jae onódiomoi. Afena omoi onónamona, afefue ómoimo llotímie mai omoi ruifíruiniño iri. Afe íena ruifíruillamona abí omoi rairuiri. Mei jaiiai biniemo Juziñamui jóonega lletárama dáinana ruifíruitino, duere íaioi finóinamona jaca jilloñediaioi. Afe baimo birui monámona caimo llotímie dáinana cai ruifiruiadi, daje izói ua jilloñeiticai. 26 Jaiiai aféruimo ie úrilla uai éniena diga icaiño riire docáitate. Mei íadi birui afémie uafue llote: “Nane afe emódomo dáacaiño éniena riire docáitaiticue, naa caifo ite monániari,” daide. 27 Afémie daína “Nane afe emódomo éniena dáacaiño docáitaiticue” Juziñamui íirairuillaído finóllifue caina daide. Aféruimo nana ie finoca raa, ranítado izírilla izói níraidoite. Afe níraíduado nana níraírede ráaniaina, afémie oni niné táinocaitaite. Mei íadi nírainide ráaniai jaca méidonide; fiébillano ziiñona íitiaioi. 28 Ja birui Juziñamui méidonide illáimana illánomo jaináitagacai. Iemona íena “fere figura” cai daiífireilli. Afe llezica caimare úrillafuedo mai íemo cai íóbilli. Ua, ñue jacíruioicana ie uáillaímo mai ñue cai cacáreilli. 29 Mei jii, cai Juziñamui, irai amena cuarilla izói, nana íaifueredínona jaca ziiñona íaioina duere fínoite.

## 13

*¿Nie izói Juziñamuina íóbitaredicai?*

<sup>1</sup> Amatíai, mai conímana omoi izírufireiri. <sup>2</sup> Daje izói onina bitínona mai dúecaillano ñue caimare uáidori, mei daií dárie jíáimana íaioi caimare

uáidofirenamonana ónonino Juzíñamui abí ímiaina  
jofolínnotiaioi.

<sup>3</sup> Iemo Jesumo ínuamonana llavécamacimo ñue  
omoi úibicairi. Ua dájena llavécano izói, mai  
íaiomoi comeci omoi facari, íaiomoi canóllena.  
Daje izói duere finoca Jesumo jaináidimacimo,  
mai omoi ñue comeciiri, mei daní omoi abina  
jáimaci duere zefuítarede; íemo bimaci diga daií  
zéfuitiomoiiza. (Dáamacidiomoiiza.)

<sup>4</sup> Daa come daje ringona áireia ñuera. Afémie  
dama ie ai abina onona ñuera. fima dama ie ai jeta  
ñuera. Mai bifue íáiñeno ñue omoi fimairi. Mei  
Juzíñamui nana jiruiredinona izire jicánuano íaiomoi  
duere fínoiteza, naa dama áireiñeno ringo diga  
itínori.

<sup>5</sup> Daje izói omoi comeci ífuenta ñue onoiri.  
Ucubena aillo jitailla fiénide. Afemona abí omoi  
rairuiri. Mei jáífodo ómomo due jiza ite ráaniairi  
júfidoñeno caimare uái iri, mei Juzíñamui uafue  
dáideza: “Ona fáicanocaiñeiticue. Daje izói jaca  
ona zóofeñeiticue,” daide. <sup>6</sup> Iemona minícana  
jizíreñeno daiíredicai:

“Juzíñamui cuena canófiredimie; íemona fieni cue  
finóacadimiena jáciruiñeiticue.”

<sup>7</sup> Iemo mai Juzíñamui uai ómomo nano fueñe  
jino llófuetinomo ñue omoi uibíoiri, mei ñueodo  
ómoina ifódiaioiza. Iaiomona comuide ñúefuiaimo,  
féitañeno mai ñue omoi comeciioiri. Afémaci Jesús  
ícoinia titácaiaioi, mei íadi afémaci fáicanocaiñeno  
Jesumo ínua izói, afe izói féitañeno mai omoi  
ínofireiri.

<sup>8</sup> Mei jii, Jesucristo nanómona ie illa izói, ja birui jiáifodo méidoñeno dáamieoicaide. Ua afémie jaca ziiñona dáamieite. <sup>9</sup> Ja birui diga jiáifodo cacaide onina bite ónoñega fiēni llófueinafuiāi ite. Aféfuiāi ñúeomona oni nibéfodo omoi baiitaiacadeza; áfemona abí omoi rairuiri. Juziñamui cairi dúecaillano cai cánuano cai comeci náirecaitate. Afe ie cai comeci náiretaja ñuera. Mei íadi afe jicana lluáibiga güille rairuinafuiāina jeire cai óiadi, caina ñue cánoñeite. Daje izói afe uai jeire otinona canóñede.

<sup>10</sup> Jesucristo cai ifomo fécafue Juziñamuimo caimare cai nabáirillena dani caimo dúide. Nana Judíuāido Juziñamuimo úrirāini, ie jaiāi garíracomo aillo Juziñamuimo ánozille nícidogafuiāi finódiaioi. Mei íadi afémāci Jesús dibénemo ite cáimafuiāina llínonidiaioi.

<sup>11</sup> Judíuāimona comínido Juziñamuimo úritillaīma dáacaiño naga fimona afe faga rille die Juziñamui icomo uite. Afe Juziñamui icomo ite jofoidē ñue rairuícacomo comini íāifue ícoīnia díena uite. Mei íadi afe faga rille, comini illácuai jinomo jobáifirediaioi. <sup>12</sup> Afe izói Jesús Jerusalén jinomo duere zefuide, dama ie die tóillado nana comini fiénidifue oni dóllena. Daií duano íaioīna Juziñamui iena mamede. <sup>13</sup> Ie jira nana Judíuāi Juziñamuimo ánozille nícidogafuiāina féitajano, mai dama Jesumo jaca cai ínolli. Ua, daií íemo caimare cai jaināinamona jilloitīcai. Ie meáire duere zéfuilla izói, duere cai zefuīadi, áfena náfueñeno nai caimare íemo jáinaitīcai. <sup>14</sup> Ja bíniemo ñuera méidoñega illano caimo iñede; mei íadi Juziñamui finoca monamo ite méidonide cai

illínomo izire úiñoidicai, caimare zíñona ie diga cai nabáirizaillena. <sup>15</sup> Iemo, Jesús caido Juzíñamuimo nahí úriraimana íllamona, mai Jesudo nágaruillai Juzíñamuimo ñúefue cai nitalli. Ua, cai fuemo ite uaido Juzíñamuina caimátaitaredicai. Cai Ocuíraima Jesús mámeccido cai úriadi, jaca Juzíñamuina ebire íóbitaredicai. <sup>16</sup> Daje izói nágarui jiáima canolle ñúefue jeire o úana, mai féitañeno iri. Aféruído jitáidinomo ómoimo ite raana jeruíñeno fecari; mei aféfuiaina Juzíñamui iere íóbideza.

<sup>17</sup> Omoi illaini llogáuaimo ñue omoi cacáreiri. Aféuai anamo ñue omoi itábicaire; mei omoi comeci ñue íllena aféllaini nágarui ómoina rairuífrediaioiza. Ua aféllaini ómoina rairuilla nie izói íadi, afémaci Juzíñamuimo jino llórediaioi. Ie jira íaioi táijinana omoi daidóñeno iri; mei jiáifodo ñue íaioi anamo omoi itábicaire. Afedo aféllaini Juzíñamui ocuica táijinana caimare fínoite. Mei íadi afémaci afe táijinana zúurecana finóadi, figo cánoñegaomoi.

<sup>18</sup> Mai birui caido Juzíñamuimo omoi úriri, afe Juzíñamui cai canólleza, mei cai comeci ifue íáinideza. Mei jii, nágaruillai náganuiaimo illa dígamie íaioi eróicana ñue jaícina figomiena íacadicai. <sup>19</sup> Ua, cuedo Juzíñamuimo comécido omoi úrillena izire jicádicue, raire meine abido omoi cígimo Juzíñamui cue orélleza.

*Iraicaiño uáidota ñue ézicínocaillafue*

<sup>20</sup> Ja birui Juzíñamui ñue omoi ézicillena jicádicue; Moo Juzíñamui, comécina uái illafue comínimo fécaitimie. Iemona cai Ocuíraima Jesuna tíllanomona Juzíñamui meine abido cáatate, mei

Jesús ie die tóillado nana cai mo ite fiénidifuiaina muiño deza. Múinñoano ziiñona Juziñamuimo cai nabáirillafue cáiena mamede. Ua, Jesús jamánomo ñuera ovejai úiñoraima izoide. Afémie ovejai rairuilla izói, caina úiñofirede, comécina uái cai íllena. <sup>21</sup> Afe bie Juziñamuimo omoi comeci náireillena jicádícue. Ua nana ie ñuera rínodo omoi comécina ñue jaícina caimare náireillena jicádícue. Afe bie cue jicácado ie jitáinafueña ñue comini eróicana fínoitíomoi. Afe llezica Juziñamui comeci óiacana izói dani cai mo zúillena izire íemo jicádícue. Mei daí jamánomo ebírenafue Jesucristomo, ninomo fúñeítina nitáredicaíza. Mai, daí íteza.

<sup>22</sup> Amatíai, nana bie ómoimo cue cuega lletárafuiaimo járitaño fia omoi coméciri. Afena izire ómoiena jicádícue, mei bie ómoimo cue cuegáuai íanorideza. <sup>23</sup> Iemo jíáífueña ómoimo fidítaacadícue. Jae cai ama Timoteo llavéinanomona jae jino zuitaca. Omoi dine nai jáiñeíticuemo, afémie cue illánomo raíre dúciadi, níbai daane omoi éroizaíbiticoco.

<sup>24</sup> Nana omoi llófueite illáinina cuedo ñue uáidori, naa afénomo ite Jesumo ínotinori. Itáliamona benomo cai bite ámatíai ómoimo uailai orédiaíoi.

<sup>25</sup> Juziñamui nana ñue omoi íllena ñue ézicíteza. Mai.

Daíítadeza. Jae níe.

**Juziñamui Ñuera Uai**  
**New Testament in Huitoto, Minica**

copyright © 2011 Wycliffe Bible Translators, Inc.

Language: Minica Huitoto (Huitoto, Minica)

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Huitoto, Minica

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.



PDF generated using Haiola and XeLaTeX on 11 Nov 2022 from source files  
dated 29 Jan 2022  
740f11a2-2e26-57f5-a3a7-5deb2d20bd24